

SABALA YA MAKUMI

SAMBWADI YA DANIEL



Matondo mingi, na nge, Mpangi Neville. Mbote, bankundi.

Ya ke ntangu ya mbote na kuvutuka diaka awa na tabernacle na suka yayi, samu na kulandila Nsangu yayi ya nene yina beto ke tula kikesa na kutendula, *Sabala Ya Makumi Sambwadi Ya Daniel* yayi. Mpe beto ke na kiesa na kumona bantu mingi me vukana na kilumbu yayi ya mwini ya ngolo, mpe kasi beto ke na kiadi samu beto ke na bisika mingi ve ya kuvwanda. Kumona bantu me kangama kintwadi mutindu yayi mpe bantu ya kutelama bisika nionso, ya ke sala mbote ve. Mpe beno ke ya kuvwanda ve na mutindu ya mbote, ya ke sala beno mpasi na kubakula yawu. Kasi beto ke sala nionso yina beto lendaka sala samu na kusala nswalu.

² Mpe—mpe, bubu yayi, mu ke na kivuvu ti beno, kana mu baka fioti ntangu ya yinda, ti beno ke lemvočila munu, samu beto zola kusukisa Nsangu yayi, ti beto ke sukisa yawu kaka. Beto me kabula yawu na bitini tatu samu ti beto simba yawu mbote.

³ Ntangu yayi, ya kieleka, dibuundu yayi ke monana kuzaba ti yayi, to Bansangu yayi, kele na bande. Mpe ba ke tinda yawu na yinza ya muvimba. Na kutala konso yinsi ke kuzwa ba-bande yayi na yinza ya muvimba. Mpe mu ke zola kutuba yayi na bayina ke kuwa bande, konso kisika yina beno kele, na konso kitini yina ya yinza beno kele, ti ya lendaka vwanda na mambu yina na kati awa yina beno fwana wisana na munu ve samu na malongi yayi mu—mu ke longa. Kasi mu ke zola zonga mutindu yayi, bampangi ya munu, mu banza, ti kana beno lendaka tendula yawu na mutindu yina beno ke mona yawu, ya lendaka vwanda luswaswanu na yina mu ke kwikila. Kasi, mu ke vwanda na kiesa ti beno kuwa yina beno fwana tuba.

⁴ Mpe ya ke na dibanza yina mu ke longaka Bansangu yayi, yina me katuka na . . . na Ndinga ya Nzambi, na kati ya ntima ya munu. Ya ke samu ti Dibundu kukuma ya kulutila mbote, dibuundu ya muvimba, Dibundu ya yinza ya muvimba; Dibundu ya Klisto, ya yinza ya muvimba. Mpe ya kieleka mu ke kwikila ti beto ke na kuzinga na kilumbu ya nsuka. Mpe mu ke sala kingolo-ngolo na kutendula yawu, mpe kasi mu ke meka ve na kutula na ntuala na dibanza mosi, na kupusa yawu, na mutindu mosi to yankaka. Mu me salaka ata fioti ve, yimbi ya mutindu yina, mutindu mu me zaba.

⁵ Na bantangu mingi bantu ke kuwa ba-bande, mpe ba ke tuba, “Mbote, mu me wisana na yawu ve. Yandi me zaba dilongi

yayi ve, yandi me zaba Masonuku ve.” Mbote, yina, yina lendaka vwanda nionso ya kieleka. Beno me mona? Mu lendaka tuba ve ti ya ke ya kieleka ve.

Kasi, samu na munu, mu—mu ke longuka Yawu, kukondwa kubaka mwa—mwa bampova. . . mu ke tanga yina bantu yankaka me tuba, mpe mu ke sepelaka na bawu. Bima nionso yina muntu nionso me tuba, mu ke sepelaka na yawu. Kasi na yina—na yina mu ke kwenda na yawu na Nzambi, mpe mu ke vwanda kuna tii kuna mu lendaka tendula yawu, kubanda na Genèse tii na Apocalypse, na manima kumona ti nionso ke simba na kati ya Biblia. Na manima mu—mu ke zaba ti ya ke pene-pene fioti kieleka. Mpe, na yina, kisika yina beno kele ya kusungama, ya ke kaka kisika mosi mu me basika na nzila. Mpe ya lenda vwanda kisika yina beno kele na kifu, to ya kusungama, ya ke kisika yina mu me basika na nzila, mpe mosi to yankaka.

⁶ Na yina, beto ke sepelaka na beno nionso bantu ya mbote yina kele awa na kivinga yayi, na suka yayi, mpe beno bantu ya mbote yina ke kuwa ba-bande yayi. Mpe beto. . . Nionso yina me salama, ya kele samu na Kimfumu ya Nzambi. Mu ke na bankundi ya mbote na yinza ya muvimba, yina mu ke sepelaka na bawu mingi, mpe mu ke kwikila ti mu ke lutisa ntangu ya Seko na bawu. Mpe mu ke zola ve na kati ya ntima ya munu na kumeka ku—kuvuna bantu yayi, ata konso mutindu yina, kasi kumeka kusala yina nionso mu lendaka sala samu na kumeka kusadisa bawu.

⁷ Mu ke na nsatu mutindu Salomon salaka na ntangu yandi sambilaka, mpe yandi tubaka, ba pesa yandi ndwenga ti yandi vwanda na kiyeka ya kutwadisa bantu ya Nzambi. Yina kele kieleka kisambu ya munu.

⁸ Bankundi ya munu yina kele na munu awa, na nziunga, mu me mona Mpangi Mercier, mpe—mpe Mpangi Roy Borders, mpe Mpangi Neville, mpe Billy Paul, mwana ya munu. Gene kele kisika mosi kuna, mpe bampangi, Teddy, na bayankaka. Mu ke sepelaka na bantu yina nionso me kwisa samu na kusadisa munu.

⁹ Mu ke bambuka moyo awa ntama mingi ve, Mpangi Leo, vision yina yandi kuzwaka; ndosi mosi, yandi bokilaka yawu, na mpimpa mosi ntangu beto kutanaka mbala ya ntete; yina yandi monaka nsongi ya mongo ya nene mutindu pyramide mosi, na zulu kuna na mipepe. Mpe mu vwandaka kuna na zulu mu vwandaka longa, kisika mosi kuna, mpe yandi mataka samu na kutala yina ya vwandaka. Mpe ntangu yandi kumaka kuna na zulu ya nsongi ya mongo yayi, na yina, yandi tubaka, ti mu vwandaka ntama mingi kuna na kati ya nsemo mosi ya palata, to mutindu plateau mosi, mu vwandaka ya kutelama kuna, mu vwandaka longa bantu. Mpe yandi bendaka bukebi ya munu, mpe mu talaka na sika ya yandi. Mpe yandi tubaka, “Wapi

mutindu nge me sala samu na kukuma kuna? Wapi mutindu mu ke sala samu na kukuma kuna?”

¹⁰ Mu tubaka, “Leo, muntu mosi ve lenda kuma awa. Nzambi fwana nata muntu awa. Ntangu yayi, nge fwana mata awa ve. Nge fwana kulumuka kuna na nsi mpe kupesa kimbangi na bantu yina kele na nsi kuna, na manima nge me mona yawu, ti ya kele Kieleka, ti Yayi kele Kieleka.” Leo kulumukaka, samu na kupesa kimbangi na bantu.

¹¹ Ya me luta bantangu yikwa, Mpangi Leo? Bamvula mingi, mutindu yina ve? Bamvula mingi. Kubanda ntangu yina, na mutindu mu me zaba, yandi kele ya kwikama na kusalaka mutindu yina, na kupesaka kimbangi na bantu ti ministere me katuka na Nzambi. Ntangu yayi, mpe mu—mu ke zola ve ti yawu kukatuka na munu. Kana ya me katuka na munu, na yina ya ke vwanda mbote ve, samu ya ke na kima ya mbote ve na kati ya muntu. Beno me mona? Ya fwana katuka na Nzambi.

¹² Ntangu yayi, ntangu mu talaka na lweka. . . Mazono na manima ya midi, mu pesaka mbote na nkundi ya munu, Mpangi West. Mu me mona yandi ntete ve kisika yandi kele, na kati ya kivinga yayi; yinga, mu me mona yandi ntangu yayi, na suka yayi. Mpe beno zaba kitamina yina bantu yayi ke sala na tomabilu, ntama kuna na—na Alabama, na Lumingu, samu na kukwisa awa, ntama kuna na Alabama!

¹³ Mpangi Welch Evans, mu monaka yandi ve na Lumingu me luta. Muntu mosi me tuba ti yandi me vwanda awa bubu yayi. Bantu yina ke salaka kitamina ya yinda na tomabilu katuka Tifton, na Georgie, samu na kuvwanda awa. Mpe mpangi yayi me vwanda awa, bayina kele kintwadi na yandi. Ba kele mingi! Mpangi Palmer ya Macon, na Georgie. Mpe mu me mona, mu ke kwikila, Mpangi-kento Ungren na bayankaka kuna na manima. Ba me katuka kuna na Memphis, na Tennessee. Ntangu yayi, beno banza. . . Mpe bayankaka me katuka bisika yankaka. Mu me kutana na mama mosi na kati awa yina me katuka kuna, kuna na Caroline du Nord.

¹⁴ Ntangu yayi, beno banza ti bantu yayi awa. . . Mu me tala kuna, mu me mona bayina me katuka na Chicago, mpe bisika yankaka, yina me sala bankama na bankama ya ba-kilometre, kaka samu na kukwisa na lukutakanu. Na yina, ntangu ba ke kuma awa, ya ke na bisika ya kuvwanda ve. Kivinga ke na climatiseur ve; kivinga mosi ya ntama ya mwini ya ngolo, na kuvwanda, na kukatulaka mutoki. Na kubakaka mbongo na mesa, ya bana, na kukwisa awa samu na kuwa Nsangu. Beno zola tuba na munu ti ya kele ve. . . na simu yina ya nzadi, kisika mosi kuna, ti ya ke vwanda ve na kisika yina ba ke kwenda, mosi ya bilumbu yayi? Ya kieleka, ya kele. Ya ke kuvwanda ya kwikama! Bantu yina kele bayina ke futaka mosi ya kumi ya bawu. Ba ke kwisaka kaka ve, kasi ba ke nataka mosi ya kumi

ya bawu na makabu ya bawu, mpe ba ke nataka yawu na yinzo ya Mfumu, ba ke mekaka na kusala yina kele ya mbote. Nzambi kusakumuna mingi bantu ya kwikama mutindu yayi! Mawa mpe lemvo ya Nzambi kuvwanda na bawu.

¹⁵ Mu me mona nkundi ya munu, Charlie Cox, bayina me katuka na Kentucky ya sud. Mpe kaka bisika nionso, beno tala bisika nionso, beno ke mona bantu me katuka na bisika yankaka.

¹⁶ Bakala yayi ya ntwenia me vwanda kuna, mu me zimbana nkumbu ya yandi. Mu kutanaka na yandi na Chicago. Kasi nge me katuka na lukolo mosi ya Biblia ntama na awa, kisika mosi kuna, mutindu yina ve? [Mpangi-bakala me tuba, “Na Springfield, na Missouri.”—Mu.] Na Springfield, na Missouri; lukolo ya Biblia ya ba-Assemblée ya Nzambi. Yinga. Mbote, ya ke kitoko. Beno me mona, ba me katuka kaka bisika nionso, samu na kukwisa awa na mwa yinzo-Nzambi yayi ya ntama ya mpamba-mpamba.

¹⁷ Beno banza kaka, samu na yawu, pene ya bamvula makumi tatu me luta ntangu mu tulaka ditadi ya nsongi na suka yina, mu vwandaka ya kutelama kuna na Bala-bala ya Sambwadi, kuluta bala-bala mosi na awa. Mu vwandaka me kwelana ntete ve, mu vwandaka kaka bakala ya ntwenia. Mpe mu monaka vision mosi ya bantu ya kukangama mpe ya kufuluka na kati awa yina me katuka bisika nionso. Mpe mu vwandaka na kiese mingi, ntangu mu vwandaka ya kutelama na manima ya chaire. Mpe ya ke na ntangu yina Yandi tubaka na munu, “Kasi yayi kele tabernacle ya nge ve.” Mpe Yandi vwandisaka munu na nsi ya mazulu. Mpe beno zaba disolo yina me bikana ya ke ya kusonama na dititi ya Biblia yina kele kuna na kati ya ditadi ya nsongi.

¹⁸ Mu ke vutula matondo mingi samu na beno. Mu lenda ve. . . Ti, ya ke kaka fioti, na ku—kutuba, “Mbote, mu ke vutula matondo samu na beno.” Kasi mu ke sambila samu na beno. Mu ke kwikila na beno. Mu ke kwikila na banzingilu ya beno ya Nzambi. Mu ke kwikila ve ti bakala mosi to kento mosi lendaka sala bankama na bankama ya ba-kilometre na tomabilu samu na kukwisa awa, samu na kutalisa mutindu ya bilele yina ba me lwata. Mu—mu ke banza ve ti ba lendaka sala mutindu yina. Ve. Ba lendaka kwisa awa ve samu bawu mona bawu. Ba ke kwisa awa samu ba ke tula mabanza ya bawu mpe ba ke ya kuvedila samu na mpulusu ya moyo ya bawu. Kisambu ya munu kele ti: “Nzambi sadisa munu, sadisa munu na kuvwanda kieleka ya ata ndambu ya kuvedila mutindu bawu, samu na kumeka na kulonga bawu na ntima ya munu ya muvimba, mpe na kuingilaka na Nzambi.”

¹⁹ Nsangu, beno me mona, na suka yayi, beto yemaka yawu awa na tableau. Ya ke kaka samu na kusala kaka, samu na kutendula na mutindu mu ke kwenda na ntwala, samu na kumeka kusala ti beno bakula yina mu ke meka na kutubila.

²⁰ Mpe *Basabala Makumi Sambwadi Ya Daniel* yayi me vwanda dilongi mosi ya nene, pene-pene, ya bilumbu zole mpe bampimpa zole, Mu me kuma, na nsuka ya sabala awa, mu me lutisa na zulu ya yawu, samu na kumeka kuzwa bampova yina ke tuba Kieleka. Yawu fwana fwanana na Biblia nionso. Beno me mona? Beno lenda kaka kubaka Yawu ve, mwa Masonuku mpe kusala dibanza mosi, na manima kutuba, “Mbote, tala yina ya me tuba,” na manima kubaluka mpe kutuba, “Mbote, kasi kuna Yawu—Yawu ke tuba kima yankaka, yina ke telemina *yayi*.” Yawu lenda sala yawu ve. Yawu fwana tuba kima ya mutindu mosi ntangu nionso. Kana beno sala yawu ve, na yina, kuna, beno kele—beno kele na kifu. Mpe ya ke mutindu yina mu me meka na kulonga Yawu.

²¹ Na kuluta, na ba-bande, samu ya ke na ba-bande. Masawula ya nene mu me kuzwa samu na ba-bande, na bampangi ya munu na bisika nionso na yinza, kele samu mu ke kwikilaka na lemvo ya Nzambi, ti mu ke longaka mutindu mu ke salaka yawu, ti, “Ba zabaka beto na ntwala ya mbandukulu ya yinza.”

²² Bampangi ya munu ya ba-Pentecotiste, na yina, mu zaba ti beno mutindu ya beno ya kumona mambu kele ya misiku, beno me mona, mpe mu—mu zaba ti ya ke yangisa fioti mutindu ya beno ya kumona mambu. Kasi beno zola, mutindu mpangi ya Muklisto, beno zola kaka kubanza na yawu mingi ti beno vwanda kufukama na ntwala ya Nzambi, na Biblia ya beno, mpe kulomba na Nzambi na kutendula yawu na beno? Beno zola sala yawu? Beno zola baka lweka ya misiku mpe kumeka na kufwanikisa yawu kubanda na Genèse tii na Apocalypse?

²³ Mpe, “Nkuna ya nioka,” ya ke tutisa mingi; bantu mingi ke kwikilaka na yawu ve. Kasi, kana beno ke tanga kaka na Genèse, Biblia me tuba ti nioka vwandaka na nkuna. “Mpe mu ke tula kimbeni kati-kati ya nkuna ya nioka na Nkuna ya kento.” Na yawu, nioka vwandaka na nkuna. Mpe kana nkuna ya nioka vwandaka ya kimpeve, na yina Yesu vwandaka muntu ve, na yawu Nkuna ya kento vwandaka ya kimpeve. Bawu zole vwandaka na bankuna, mpe kimbeni kele kaka kuna. Nioka vwandaka na nkuna. Mpe kana beno zola baka kaka Biblia ya beno, mpe beno kuvwanda mpe beno vwanda ya kieleka na luzitu na ntwala ya Nzambi, mu ke kwikila ti Nzambi ke monisa yawu pwelele na beno.

²⁴ Mpe kana beno bakula yawu ve, mu ke—mu ke na luzolo, na konso ntangu yina, ya kusala nionso mu lendaka sala samu na kusadisa beno, na nzila ya mukanda to na nzila—to na nzila ya masolo ya kingenga, to konso kima yina mu lendaka sala samu na kusadisa beno. Na yina, beto me mona ti yina ke vulusa muntu ve, to ya ke bedisa muntu ve, kasi ya ke nata kaka Nsemo na diambu yina beto ke na kumeka na ngolo nionso na kunata bantu na kumona. Beno me mona? Ya ke nata kaka Nsemo.

25 Ntangu yayi, samu na kivinga yayi ke monana, mu me tuba yayi samu na ba-bande, beno me mona, mpe ba-bande yayi ke kwenda bisika nionso, bisika nionso.

26 Ntangu yayi beto kulumusa bayintu ya beto na mwa ntangu fioti, na ntwala beto belama na Nsoniki ya Ndinga yayi. Mpe bantu yikwa na kati ya kivinga yayi na suka yayi kele na nsatu, beno tuba kaka, “Mu ke na nsatu. O Nzambi, wila munu mawa?” Nzambi kusakumuna beno. Mpe samu na bayina ke kuwa bande, ntangu beno ke kuwa yawu, bika ti Nzambi kupesa mvutu na lombilu ya beno.

27 Tata ya beto ya Mazulu, beto kele bantu yina ke vutula matondo, kasi beto kele bantu yina me lunga ve. Kasi beto ke belama na kiti ya Nge ya lemvo na suka, samu ti ba me bokila beto na kukwisa. Yesu tubaka, “Nionso yina beno ke lomba na Tata na Nkumbu ya Munu, Mu ke sala yawu.” Ntangu yayi, beto zaba ti ya kele kieleka.

28 Mpe awa na kati ya kivinga yayi, mpe kuna na yinsi kisika ba-bande ke kwenda, ya ke vwanda kieleka na makumi ya bamafunda ya Baklisto yina me butuka mbala ya zole ke kuwa yayi. Mpe beto zaba, Tata, ti ntangu beto me butuka mbala ya zole, ti mpeve ya beto me butuka na Zulu. Ya ke Mpeve ya Nzambi, Mpeve-Santu, na zulu ya beto. Mpe beto me bakula ti Mpeve-Santu yina kele ya ngolo nionso mpe lenda sala samu na beto bima nionso yina beto zola ti yawu kusalama. Na yina, Tata ya Mazulu, beto zola lomba Nge na kutula lukwikilu ya beto na kimpwanza na ntwala ya Mpeve yina, ti Yawu fwana vwanda na kiyeka ya kupesa beto na suka yayi, mpe samu na nkembo ya Kimfumu ya Nzambi, balombilu ya beto nionso mpe bansatu ya beto nionso, ti beto fwana beluka na bimbevo ya beto mpe bampasi ya beto, ti beto fwana sadila Nzambi ya beto na yina nionso kele na kati ya beto.

29 Zibula makutu ya beto ya lubakusu bubu yayi, mpe mutindu mu ke sala kingolo-ngolo kutubila kiuvu yayi ya nene, mpe kutendula yawu na mabanza ya bantu. Ntangu yayi, mu me sonika yawu awa, Mfumu, na zulu ya papié, mpe mu me yema yawu na tableau, schéma yayi, kasi mu kele ya muvimba na kiyeka ve ya kutendula yawu. Ntangu yayi beto ke bokila Nge, Mulongi ya nene Yina sonikaka Ndinga, Yina twadisaka Yawu na kimpeve, Yina pesaka Yawu na profete Daniel. Mpe beto ke sambila ti Nge ke fidisa lutwadusu yayi ya kimpeve na suka yayi, na bilumbu yayi ya nsuka, mutindu Yandi tubaka ti Buku ke vwanda ya kukanga tii na ntangu ya yayi, ti Nge ke zibula baluzabu ya beto. Mpe bika ya vwanda na lukwikilu ya buyambi na kati ya bantima ya beto yina ke bika Ndinga kukota mpe kubaka Luzingu, mpe na kubasisa bayinti ya kieleka na kati ya baluzingu ya beto, yina Yawu fwana basisa. Lukwikilu ya beto na Nzambi, bika yawu pesa beto yawu na suka yayi. Samu

beto ke vingila na kukikulumusa nionso ntangu yayi, mpe na kubiekaka beto mosi na Nge, na Nkumbu ya Yesu Klisto. Amen.

³⁰ Ntangu yayi, beto ke vutula matondo na suka yayi, samu na ntangu ya nene diaka ya kuzibula matiti ya Ndinga ya Kukonda nsuka ya Nzambi.

³¹ Ntangu yayi, kana mu me kukipesa kisalu ya kumeka na kutendula yawu, ya kele samu beto ke na kulonguka Buku ya Apocalypse, mpe beto me mona bansungi sambwadi ya dibuundu. Mpe, na yina, na nsuka ya kapu 3 ya Buku ya Apocalypse, Dibuundu me zanguka na ntoto, samu na kukwenda na Nkembo. Mpe mu ke meka, na ntima ya munu ya muvimba, na kutalisa yayi na bantu, ti ba ke na kuingila ti kima mosi kusalama, yina ba ke mona ti ya me sonama na kati ya Buku ya Apocalypse, ntangu ya vwandaka ve samu na nsungi ya dibuundu. Mpe beto me kuma pene-pene na nsuka ti beno ke banza yawu ve.

³² Mwa bilumbu fioti me luta na mpimpa mosi, Billy, ya munu. . . To, bokila ya munu ya kento, mu zola tuba, bokilaka munu, kuna na kati-kati ya mpimpa, mpe tubaka ti ya vwandaka na bakala mosi na nkumbu ya Andy Herman, yina kele kisoni ya munu, vwandaka ya kulala na mbeto ya yandi, ya lufwa na lupitalu. Mu kwendaka mona yandi. Ba pesaka yandi ntunga ya mpongi, mu. . . na yina, yandi vwandaka ya kulala, mpe mu lendaka solula na yandi ve. Na suka yina landaka. . . Mu lombaka na Nzambi na kubika yandi na luzingu tii kuna mu ke tuba na yandi. Andy kele bakala mosi ya mbote, kasi yandi vwandaka kaka Muklisto ve. Yandi kele noko ve; yandi kele kisoni, yandi me kwelanaka na kisoni ya munu ya kento.

Na yina ntangu Tata-kento Ade, yina vwandaka kuna, tubaka na munu, yandi tubaka, “Billy, bamvula makumi nana yayi ya luzingu ya yandi, yandi me sadila Nzambi ve. Kasi,” yandi tubaka, “mwa basabala me luta yandi vwandaka ya kuvwanda na yinzo. . .” Yandi, na bamvula makumi nana, ya kieleka, yandi ke salaka mingi ve bisalu ya maboko. Kasi yandi tubaka. . .

Yandi bokilaka yandi mpe yandi tubaka, “Ade, nge zaba yinki? Klisto me kwisa na ntwala ya munu awa, na mwa ntangu fioti me luta.”

Yandi talaka yandi, yandi tubaka, “Andy, keti—keti. . . Yinki kele diambu?” Yandi tubaka. . .

Yandi tubaka, “Ve. Yandi telemaka na ntwala ya munu, mpe Yandi tubaka kima mosi.”

Yandi tubaka, “Yinki Yandi tubaka?”

“Ntangu me luta ti nge ke banza yawu ve.”

³³ Na mwa basabala na manima ya yina, basabala zole to tatu, yandi belaka mpe yandi vwandaka ningana ve na mbeto ya yandi

ya lufwa, kuna na lupitalu. Mu tubaka, “Tata-kento Ade, nsoni na nge samu nge me bokila munu ve to muntu mosi, samu na kukubima ntima ya yandi samu na ngunga yayi yandi me kuma na ntangu yayi.”

³⁴ Mu lombaka na Mfumu, na suka yina landaka, ntangu mu . . . Yandi lendaka tuba ve, na yawu mu yufulaka yandi kaka. Mu tubaka, “Nge lenda kuwa munu Noko Andy?” Mpe yandi—yandi lendaka telemisa fioti yintu ya yandi mpe kuningisa mbanga ya yandi. Mu sambilaka samu na yandi, mu nataka yandi na kufungula masumu ya yandi na ntwala ya Nzambi. Mu zolaka botika yandi, mpe Tata-kento zolaka kubaka mbotika.

³⁵ Mpe mu zengisaka couloir, samu na kukwenda mona mama mosi ya ntwenia yina vwandaka zinga na quartier awa, yina ba zolaka tinda na lupitalu ya bantu ya yintu, mpe Mfumu salaka kima ya nene samu na yandi, yandi me vtutuka na yinzo.

Na yina, na nzila, mu kutanaka na mpangi-kento mosi ya ndombe, mpe yandi tubaka, “Nge kele Mpangi Branham ve?”

Mu tubaka, “Yinga.”

Yandi tubaka, “Nge ke bambuka munu? Mu kele Mama Drye.”

³⁶ Mpe mu tubaka, “Yinga, mu ke kwikila ti mu ke bambuka moyo. Pete Drye mpe bayankaka.” Mu tubaka, “Yinga, mu—mu ke bambuka nge.” Yandi talaka na kati ya kivinga, mpe ntangu yina beto. . . mu kukiyufulaka samu na yinki yandi me tuba mutindu yina. Mpe, kuna, Noko Andy telemaka na mbeto, mpe yandi vwandaka kuna, yandi vwandaka ningisa misapi ya ya yandi mpe maboko mutindu muntu nionso, yandi vwandaka meka na kukulumusa kima yina, kima yina ya mbeto, samu na yandi basika kuna mpe yandi kwenda. Ntangu yayi ba me kwisa samu na kubaka mbotika na Nkumbu ya Mfumu Yesu, yandi na kento ya yandi.

³⁷ Na yina, mu me tuba yawu samu ti, ntangu me luta ti beto ke banza yawu ve. Mpe mu ke kwikila ti *Basabala Makumi Sambwadi ya Daniel* yayi ke nata beto na kubakula yawu.

³⁸ Ntangu yayi, mingi ya bampangi ya beto ba-Pentecotiste, yina mu me tuba ntama ve na bande, ti ba ke wisana na Yayi ve. Ba ke vingila kima mosi ya nene, ya ngolo kusalama. Mpe, bampangi ya munu, kana beno zola kuwa na bukebi, mpe ve . . . mpe beno kuwa, beno ke mona ti kima yina ya nene, ya ngolo me luta dezia. Yesu me kuma pene-pene na kuvutuka.

³⁹ Dibuundu me kwenda na kapu 3 ya Apocalypse. Ba me tuba kima mosi ve kuna samu na kima mosi ve, kasi kaka kima ya nsuka vwandaka munati nsangu ya nsuka ya nsungi. Na manima, beto ke tubila ba-Juif tii kuvutuka na Kento ya makwela, na kapu 19. Kubanda na kapu 6 tii na kapu 19 ya ke kaka ba-Juif.

Yawu yina mu zolaka talisa na mpangi ya munu awa na ntangu ya Bidimbu yayi, Mpangi Wood, yina vwandaka Mbangi ya Yehowa, yandi na dibuta ya yandi nionso, awa na suka yayi, ti “nkama ya makumi yiya na yiya ya mafunda” yina vwandaka ve, vwandaka na kima ya kusala ve na Bantu ya makanda. Bawu kele ba-Juif. Beno me mona? Mpe yawu kele ve Nzutu ya Klisto ya mansweki na ntoto bubu yayi.

Kento ya makwela kele Nzutu yina ya mansweki. Na nzila ya Mpeve-Santu beto me botama na kati ya Nzutu yina ya mansweki.

⁴⁰ Ntangu yayi, beto zaba ti na Buku ya Daniel awa, kisika beto vwandaka tanga, beto ke tanga diaka samu ya kele Ndinga ya Yandi. Na kapu 19 ya Daniel, nzila ya 24.

Ba me zenga basabala makumi sambwadi samu na bantu ya nge mpe samu na mbanza ya nge ya santu, samu na kusukisa kukolama, . . . samu na kusukisa disumu, mpe samu na kusungika disumu ya nkú, mpe samu na kunata kieleka ya mvula na mvula, mpe samu na kutula kidimbu na vision mpe profesi, mpe samu na kupakula kisika ya kulutula Santu.

nzila ya 25, “Mpe ntangu yayi zaba mpe bakula, ti kubanda . . .” Ntangu yayi, yawu yina beto vwandaka tubila, mpe beto sukaka na Lumingu na nkokila, “kupakula kisika ya kulutula Santu.” Beto ke banda awa na suka yayi, na nzila ya 25. “Mpe ntangu yayi . . .”

Ntangu yayi zaba mpe bakula, ti kubanda nsamunu yina tubaka na kuvutula mpe kutunga diaka Jérusalem (ya kele “mbanza ya nge ya santu,” beno me mona) tii . . . na Ntinu Mesiya ya ke vwanda na basabala sambwadi, mpe basabala makumi sambanu na zole: mpe ba ke tunga diaka bisika, mpe bibaka, ata zole na bantangu ya mpasi.

Mpe na manima ya basabala makumi sambanu na zole ba ke katula Mesiya, mpe ya ke vwanda na muntu ve samu na kunwanina yandi: mpe bantu ya ntinu yina ke kwisa bebisa mbanza mpe kivinga ya santu; mpe nsuka ya yandi ke kwisa mutindu kufulukuka ya masa, mpe ba me zabisa ti bakubeba yango ke vwanda tii na nsuka ya mvita.

“Mpe . . .” Ntangu yayi, beno bambuka moyo, ya kele nsuka ya mvita. Beto ke na yawu na tableau awa. “Mpe,” ntangu yayi beto ke banda kima yankaka.

Mpe yandi ke sala ngwisani ya ngolo na bantu mingi na sabala mosi: mpe na kati-kati ya sabala yandi ke sukisa munkayulu mpe dikabu, mpe kisafudi-kimwangisi ke sala busafu ya kulutula, tii na kubeba, (ya

zola tuba, nionso), *samu ti yina ba zabisaka kutiamuka na zulu ya kisafudi-kimwangisi.*

⁴¹ Oh, yinki dilongi yayi! Mu tubaka na kento ya munu kilumbu yina, “Mu ke kukiyufula kana kieleka bantu ke na kubakula yawu.” Ntangu yayi, mu zola ti beno bakula yawu. Ve. . . Kana beno fwana, beto fwana bikala awa kilumbu ya muvimba, kubikala kaka. Ntangu yayi, beto—beto—beto zola bakula yawu. Beno me mona? Beto—beto zola zaba ti ya kele Kieleka. Mpe, beno, kana beno lenda kaka kumona yawu! Mpe mu ke lomba, ntangu yankaka. . .

⁴² Na yina, na manima, mu ke bika schema ya kunamika awa, mpe beno—beno lenda yema yawu, na manima. Beno kwisa na manima ya midi yayi ntangu beno ke zola, samu na kuyema bashema mpe nionso yina. Ya ke sadisa beno na kubakula. Yawu yina mu me tula yawu kuna, samu ti beno bakula yawu.

⁴³ Ntangu yayi, beto vutuka fioti na manima samu beto kuzwa dibanza. Ntangu yayi ya vwandaka. . . Daniel vwandaka tula mabanza na bantu ya yandi, samu yandi vwandaka tanga profete Jérémie, mpe yandi bakulaka ti Jérémie tubaka ti ba ke vwanda na kimpika bamvula makumi sambwadi. Na manima, yandi monaka ti ba vwandaka dezia na kimpika bamvula makumi sambanu na nana, na yina yandi zabaka ti ntangu vwandaka me kuma pene-pene. Yawu yina yandi tulaka na lweka bisalu ya yandi nionso, kulumusaka, samu na kutuba mutindu yayi, barido ya bisalu ya yandi nionso ya konso kilumbu. Yandi balulaka kizizi ya yandi na Nzambi, yandi lwataka saki mpe mbombi, mpe mangaka madia mpe yandi bandaka na kusambila, samu na kuzaba wapi ntangu ntangu yina ke vwanda. Na yina beto mona ti, mutindu mu me tuba yawu na ntwala. . .

(Nge lenda balula yawu fioti, balula yawu na lweka *yina*, mwa fioti.) Ventilateur, ke na kubaluka mwa fioti mbangu mingi. Ya ke kanga ndinga ya munu. Na yina. . . (Matondo na nge, mpangi-bakala.)

⁴⁴ Ntangu yayi, beto me mona ti, Daniel, yandi zolaka kuzwa nsangu yayi samu na bantu ya yandi. Mpe mu ke banza, kana Daniel, na kutangaka baprofete yina kwisaka na ntwala ya yandi, mpe yandi bakulaka, ti yandi vwandaka pene-pene ya nsuka, mpe yandi bandaka na kusosa Nzambi, samu na kumona wapi mutindu nsuka kumaka pene-pene; na yina mu ke banza ti beto ke sala mbote, na kumonaka ti beto me kuma na nsuka ya nzila ntangu yayi, na kulwata ve saki na mbombi, kasi na kulosa bima ya yinza, mpe minianga ya beto ya luzingu yayi; mpe kusosa Nzambi, samu na kumona yinki kilumbu ya mvula beto kele, samu beto ke mona ti beto kele na nsuka, mpe na yina Dibundu ke manga madia mpe ke sambila mpe ke kubama. Yawu yina mu ke sala kingolo-ngolo samu na kubaka. . . Mu vwandaka zaba ve wapi mutindu kutendula yayi, na yina mu vwandaka tula

yawu na lweka, mpe mu vwandaka tuba, “Basabala makumi sambwadi ya Daniel,” samu mu lendaka bakula yawu ve. Mpe yawu yina mu me baka yawu ntangu yayi, samu na kumeka na kutendula yawu. Mpe mu ke kwikila ti, na lusalusu ya Mfumu, mu lenda sala yawu na lemvo ya Yandi, samu na kunata yawu na kisika yina, samu na kutalisa beno wapi mutindu beto me kuma pene-pene na Nkwizulu ya Mfumu.

⁴⁵ Ntangu yayi, Daniel vwandaka kaka na bamvula zole. Na yina beto me mona, ti, ntangu yandi vwandaka sambila, Wanzio, Gabriel, kwisaka na yandi na mbangu nionso; mpe tendulaka na yandi kaka ve ntangu bantu ya yandi ke basika na kimpika, kasi, diaka, nionso yina ba zengaka samu na bantu ya yandi, nionso yina bikalaka samu na bantu ya yandi. Yandi tubaka, “Ya ke na basabala makumi sambwadi yina me bikala samu na ba-Juif.”

⁴⁶ Na yina, beto ke mona, ti Yandi vwandaka na balukanu sambanu. Mpe mosi ya yawu, vwandaka kusukisa kukolama; mpe—mpe samu na kusukisa disumu; samu na kusungika disumu ya nkú; samu na kunata kieleka ya mvula na mvula; samu na kutula kidimbu na vision mpe profesi; mpe samu na kupakula kisika ya kulutila Santu.

⁴⁷ Mpe beto me mona, na Lumingu me luta na suka, ntangu Daniel vwandaka kuna, ya vwandaka sambila. Lumingu me luta na nkokila, beto me pesa Masonuku, samu ti bantu lendaka tanga yawu ntangu ba ke vutuka na yinzo. Beno me tanga yawu? Beno me zola yawu? Ya ke kitoko mingi!

⁴⁸ Ntangu yayi, balukanu sambanu. Mpe beto ke mona ti, na lukanu yayi ya sambanu, “samu na kupakula kisika ya kulutila Santu,” beto ke mona ti “kisika ya kulutila Santu” ke talisaka ntangu nionso Dibuundu, Tabernacle. Mpe kima ya nsuka ya kusala vwandaka, kupakula kisika ya kulutila Santu, ya kele Tabernacle ya Millenium na kati ya yawu Yandi ke zinga na Millenium, na kati ya yawu beto ke zinga.

⁴⁹ Ntangu yayi, bubu yayi, ntangu yayi beto ke tubila, “Yinki kele basabala makumi sambwadi?” Mpe yayi kele kitini ya mfunu mingi, basabala makumi sambwadi.

⁵⁰ Ntangu yayi, beto zaba ti Masonuku lenda tuba luvunu ve. Yawu fwana vwanda Kieleka. Mpe kana Wanzio Gabiel yayi kwisaka mpe tubaka na Daniel ti ya ke kaka na basabala makumi sambwadi me bikala samu na ba-Juif. . . Ntangu yayi, beto lendaka banza ti ya ke tubila basabala ya bilumbu sambanu. . . to sambwadi. Kasi, na kati ya profesi ya me pesama kaka na bingana.

⁵¹ Mpe na yawu, na ntembe ve ti kuna na kati ya bansungi, ya vwandaka na bankama na bankama ya bantu, bantu ya ndwenga, babakala ya mayele, yina mekaka na kutendula yina vwandaka basabala makumi sambwadi yayi. Mpe mu me tanga mingi ya milabu ya bawu na zulu ya yawu. Mpe mu

ke vutula matondo mingi na Tata Smith, ya dibuundu ya ba-Adventiste, samu na dibanza ya yandi. Mu ke vutula matondo mingi na Docteur Larkin, samu na dibanza ya yandi. Mu ke vutula matondo na bantu yayi nionso ya ndwenga, samu mabanza ya bawu samu na yayi. Mpe na kutangaka bawu, yawu me temuna munu mingi, ti mu lendaka mona bisika yina ke monana ya kusungama. Kasi samu na kubaka dibanza yina mu—mu me banza ti mu lendaka kutendula, mu me sosa na kati ya encyclopédie, samu na “ntangu,” samu na kumona yina “ntangu” zola kutuba.

⁵² Mpe beto me mona awa, beto ke na “ntangu, ntangu, mpe kati-kati ya ntangu.” Yinki kele ntangu? Yinki kele sabala? Ntangu yayi, ya vwandaka na bamvula mafunda tatu, nkama yiya na makumi tatu me luta, kubanda, kubanda Nzambi me banda na kusala na ba-Juif; bamvula mingi, mingi me luta. Daniel vwandaka na Ntwala ya Klisto, mpe na ntangu yina ya vwandaka na Ntwala ya Klisto ya vwandaka na mvula 538, bamvula 538 na ntwala ya Klisto, ntangu yandi tubaka samu na yayi “ntangu, ntangu, mpe kati-kati ya ntangu.” Mpe, basabala makumi sambwadi, beno tala kisika basabala makumi sambwadi zolaka nata yandi. Na yina, yandi vwandaka kaka na Babylone, basabala makumi sambwadi, mpe na yina Nzambi tubaka na yandi ti yawu yina ntangu ba zengaka na zulu ya bantu.

⁵³ Ntangu yayi, dibuundu ya munu awa me zaba ti na bamvula nionso mu me tuba na beno ntangu nionso ti, “Kana beno zaba wapi kilumbu ya sabala ya kele, beno tala manaka. Kasi kana beno zola zaba ntangu yina beto ke na kuzinga, beno tala ba-Juif.” Yawu kele monte. Nzambi tangaka ve—ve ntangu yina ba me zenga samu na Bantu ya makanda; ya vwandaka ve na ntangu yina ba zengaka. Mpe ya ke kisika yina mu banza ti bansoniki mingi ya nene me vukisa yawu, mpe ba vwandaka tula yayi samu na ba-Juif na Bantu ya makanda, samu Yandi tubaka, “Bantu ya nge.” Kasi Yandi vwandaka tuba na Daniel, na Dibundu ve; na bantu ya Daniel, ba-Juif. Kana Yandi vwandaka tuba na Dibundu, ya zolaka pesa kima ya kieleka ve; beno ke—beno ke vutuka ntama na manima, ata mpe na ntwala ya nkwizulu ya Klisto. ya zolaka kuluta ata mpe na konso basabala ya profesi yina beno zolaka tula yawu. Ya zolaka kuluta dezia. Kasi Yandi vwandaka tuba na ba-Juif, na yawu ba-Juif kele monte ya Nzambi.

⁵⁴ Beno ke bambuka moyo awa, ntama mingi ve, ntangu Mpangi Arganbright, ya Californie, ntwadisi ya zole ya Kimvuka ya Bayinsi nionso ya Nsangu ya mbote ya Muvimba ya Bantu ya Mumbungu, kwisaka na yinzo ya munu mpe nataka bande mosi; mpe bande ve, kasi film mosi, yina bawu... ya *Ya Me Bikala Minuti Tatu Na Kukuma Na Kati-kati Ya Mpimpa*. Yina ba salaka mutindu documentaire ya bantu ya mayele. Ntangu

mu monaka ba-Juif yina ke vutuka, ke vutuka na Jérusalem, mu kwisaka awa na tabernacle, mpe mu tubaka, “Ya monanaka ti mu balulaka diaka ntima.” Mingi na kati ya beno ke bambuka yawu. Mu tubaka, “Kumona ba-Juif yina ke vutuka!”

Yesu tubaka, na Matthieu kapu 24, “Ntangu beno ke mona yinti ya fiki ke basisa matiti.” Beno zaba yina beno ke vingila, beno me mona, ba-Juif ke vutuka!

⁵⁵ Ntangu yayi, mu ke na mwa milabu ya kusonika awa. Mu ke zola kutubila yawu. Ntangu yayi, ntangu yayi, mu ke—mu ke baka ntangu ya munu, na mutindu ti beno lenda sonika yawu diaka. Ntangu yayi, nionso yayi ke salama, yayi . . . Ntangu yayi beto . . . Na kati ya ntangu yina beto kele ntangu yayi, nionso yayi ke salama na . . . Ya kele samu na ba-Juif; ya ke na kima ve ya kusala na Dibuundu, na mutindu nionso. Kima mosi ve kubanda Apocalypse kapu 3, tii na kapu 19, ya ke na kima ya kusala na Dibuundu ve. Beno ke kuma na kima mosi ya kieleka ve na yayi. Yawu kele kaka kuna ve.

⁵⁶ Ntangu yayi mu zola kutendula wapi mutindu mu me mona yayi. Ntangu yayi, na tableau, mingi na kati ya beno ke mona ti yina mu me yema kuna, bantangu na kati ya mpwasika, samu na kutalisa wapi mutindu ya ke kwisa na kati ya mpwasika, na yina ya ke sala ti muntu nionso kubakula. Beno lenda . . . Beno lenda ve kumona yawu kuna na manima, mu banza, ya ke na bisono ya fioti mingi. Mpe ya ke bisono ya Becky. Mu banza . . . Mpe, kifwanusu yango, mu salaka ya yimbi mingi kulutula yina. Kasi, ya ke Becky me sala kifwanusu yayi, ya ndosi ya Nebucadnetsar. Mpe, Becky, mu banza ti ya ke fwanana na mwana-kento, na kisika ya fwanana na bakala. Kasi, na mutindu nionso, ya ke—ya ke pesa beto nsungu, yina beto zola.

⁵⁷ Ntangu yayi, kana beto me tanga na Biblia ti ya ke na basabala makumi sambwadi ba me zenga na zulu ya bantu, ntangu yayi, . . . ya ke na kima ya kusala na Dibuundu ve. Basabala makumi sambwadi kele na kima ya kusala na Dibuundu ve. Kana beto tala awa, na tableau, mu me tula nsungi ya dibuundu na kati-kati ya basabala makumi sambwadi.

⁵⁸ Beto ke na yawu awa. Mpangi-bakala ya Georgie yemaka yawu samu na beto awa, ntangu beto vwandaka longuka bansungi ya dibuundi. Mpe ya kieleka beto lenda bakula yina ya zola tuba. Mpembe yayi na kati ya dibuundu awa, ya zola tuba ti ya vwandaka nionso ya bantumwa. Na yina na nsungi ya zole ya dibuundu, ba vwandaka na malongi ya ba-Nicolaïtes, to, ba vwandaka na bisalu ya ba-Nicolaïtes; yawu kumaka malongi ve. Na nsungi ya tatu ya dibuundu, yawu kumaka malongi. Mpe na nsungi ya yiya ya dibuundu, yawu salaka organisation, mpe ya vwandaka papauté ya Rome. Mpe na nsungi ya yiya ya dibuundu, ya vwandaka bansungi ya mudidi.

Kana beno tala mbote, kitini yayi nionso ya mudidi ke talisa Nicolaïsme, to Romanisme. Kititi yayi ya mpembe ke talisa Mpeve-Santu, Dibuundu. Mpe, mutindu ya bandaka na ntangu ya Santu Paul, Dibuundu nionso ya bantumwa vwandaka ya muvimba ya kifuluka na Mpeve-Santu. Na yina ba-aristocrate bandaka na kukwisa. Na yina na manima bawu vukanaka mpe bawu salaka dibuudu ya muvimba ya malu-malu na yayi. Mpe dibuundu yina fioti yina bikalaka ba yokaka bawu, mpe bulaka bawu matadi, mpe ba pesaka bawu mutindu madia na bankosi, mpe nionso yina.

⁵⁹ Na nsungi ya kusungika Luther kwisaka, ya vwandaka na nsemo mwa mingi fioti, beno me mona. Na bilumbu ya Wesley, ya vwandaka na nsemo mwa mingi fioti diaka. Kasi na nsungi ya dibuundu ya nsuka awa, nsungi ya dibuundu ya ba-Nicolaïte, ya ke nsungi yina beto. . . Ba-Nicolaïte ve, kasi ba-Laodicéen, ya kele nsungi yina beto ke na kuzinga. Kana beno tala mbote, ya ke na Nsemo mingi ve.

⁶⁰ Muntu mosi, ntangu yandi monaka kifwanusu ya kunamika kuna, yandi tubaka, “Nsoni na nge, Mpangi Branham! Kilumbu yayi ya nene ya nsemo!”

Mu tubaka, “Mu ke banza, ntangu kupona me salama. . .” [Mpangi Branham me vwanda pima—Mu.] “Ya kele diaka na nsi ya kieleka; ntangu beno ke baka bayina ke na bantima ya kukondwa mvindu, yina me butuka mbala ya zola na Mpeve.” Beno bambuka moyo, yayi vwandaka nsungi ya dibuundu mosi kaka yina ba tulaka Klisto na nganda ya dibuundu ya Yandi Mosi, na kati ya yawu nionso. Beto ke zonzila yawu mingi, kasi beto ke na yawu, yawu yina beto ke na kuzonzila. Ya kieleka Klisto kele na kati ya dibuundu? Ya kieleka ya ke vwanda bantu fioti.

⁶¹ Ntangu yayi, ntangu yayi beto tendula basabala makumi sambwadi ya Daniel. Ntangu yayi mu fwana vutukila yawu diaka; milongi ya Nsangu ya mbote, kana beno ke wisana ve na yayi, ya kele mbote. Ba me kabula yawu na bansungi tatu, mutindu beto me mona na Daniel 9. Bansungi tatu. Ya ntete, nsungi ya basabala ya sambwadi; na manima nsungi ya makumi sambanu na zole, yina zola tuba makumi sambanu na zole; na manima nsungi ya sabala mosi. Ba me kabula yawu na bansungi tatu ya kuswaswana.

⁶² Ntangu yayi, mu me kabula yawu awa na tableau. Nsungi ya ntete; nsungi ya zole; mpe mutindu mu me bakula, na nzila ya Nsangu ya mbote, na nzila ya Mpeve-Santu, ti, na ntangu ya nsuka, Nzambi ke vutuka diaka na ba-Juif.

⁶³ Ntangu yayi, beto me zaba, na nzila ya Bansangu ya mbote nionso, ti Paul longaka, mpe bayankaka, ti Nzambi ke vutuka diaka na ba-Juif. Mbote, na yina, kana Yandi ke vutuka diaka na ba-Juif, wapi mutindu beto lenda tula yawu kuna na ntangu ya

Daniel? Beto fwana kutula yawu na nsungi yayi ya nsuka. Mpe ya ke vwanda na manima Dibuundu ya Bantu ya makanda me kwenda, samu Yandi ke salaka na Israel mutindu yinsi mosi, beto mutindu muntu mosi.

⁶⁴ Ntangu yayi, mu ke na mwa banoti awa yina mu ke zola kutangila beno na yina beto ke na kwenda na ntwala. Ntangu yayi:

...nsamunu ya ndinga yina tubaka ti ba ke tunga diaka Jérusalem...

Yayi, ya salamaka na kilumbu ya 14 ya Ngonda ya tatu. Kana ya ke na bayina na kati ya beno zola sonika yawu, na Hébreu beno ke mona ti ba me bokila yawu *N-i-s-a-n*, *Nisan*, yina zola tuba “Ngonda ya tatu.” Lutumu pesamaka na kilumbu ya 14 ya Ngonda ya tatu, na Ntwala ya Klisto na mvula 445, lutumu pesamaka samu na kutunga, samu na kutunga diaka tempelo. Beno me tanga Masonuku, na yina beno ke bakula yawu. Tii kuna yawu lungaka, ya salaka bamvula makumi yiya na yivwa samu na kumanisa tempelo mpe mbanza, samu na kutunga yawu diaka. Mpe mutindu Biblia me tuba awa, Daniel ke na kutuba, to Wanzio ke na kutuba na Daniel, ti:

...bibaka, mpe ba ke tunga yawu na bantangu ya mpasi.

Mpe mingi na kati ya beto ke bambuka moyo, ntangu yawu me tungama, ba vwandaka simba mbele ya batungi na diboko mosi mpe mbele na diboko yina yankaka, samu na kutala mbeni. “Mpe ba ke tunga yawu na bantangu ya mpasi.”

⁶⁵ Na yawu, beno tala mutindu mu me mona yawu, wapi mutindu mu me kuzwa yina me tala bilumbu. Ntangu yayi, beto ke na zole, bamanaka tatu ya kuswaswana. Kana beto baka manaka ya ntama ya astronomie, mpe beto ke mona ti manaka ya Julien ya ke na bilumbu nkama tatu, na makumi sambanu na tanu mpe na mosi na zulu ya yiya na mvula mosi. Ba me tanga yawu na kulutaka Sardes na bambwetete yankaka, mpe nionso yina. Ba me tanga yawu. Ntangu yayi beto ke mona ti, na manaka ya ba-Romain yina beto ke sadila ntangu yayi, ya ke na bilumbu nkama tatu na makumi sambanu na tanu na mvula mosi, na manaka yayi. Kasi na manaka ya Baklisto, to ya manaka ya profesi, beto ke mona ti ya ke na bilumbu nkama tatu na makumi sambanu na mvula mosi. Ntangu yayi, beno fwana yufula wapi me katuka poto-poto yayi.

⁶⁶ Ntangu yayi, yina mu ke tuba mu ke tuba yawu kaka na nzonzolo ya munu mosi. Mu ke kwikila ti ntama kuna na ntwala ya kubeba na yinza na mvula ya ngolo, kuna na bilumbu ya Job, mpe nionso yina, ba vwandaka tanga ntangu na kulandaka bambwetete. Mpe beto ke bakula, to ntama kuna na ntwala ya ntangu yina, ti ntoto vwandaka ya kusungama. Na manima samu na disumu ya muntu, ntoto katukaka na kisika ya yawu, mpe

yawu tengamaka mpe mvula ya ngolo nokaka, yawu yina beto ke na ba-galasi ya nene, mpe nionso yina, mpe nsongi na nsi ya ntoto nionso kele ya kufuluka na galasi. Beto me zaba yawu. Mpe ntoto ke ya kusungama ve. Ya ke ya kutengama. Kuningana me sala ti yawu kutengama kisika ba vwandaka kutala, ngonda na bambwetete, na ntangu yina ya katukaka na kisika ya yawu. To—to, beno lenda tula diaka ntima na yawu ve samu na kutanga ntangu, samu ya kele ya kutengama na lweka mosi, ya kele ya kutengama. Na yina, ya ke kubwa ve na bambwetete na ntangu mosi, samu ya ke—ya ke na lweka na ntuala ya bambwetete. Beno me bakula? Mu ke kwikila ti ya ke mutindu yina.

⁶⁷ Ya me bikala mutindu yina ya kutengama. Mpe yina ke talisa kaka ti yayi kele kaka nsungi na kati ya ntangu. Beno me mona yawu ve? Nzambi ke vwandaka na bima yina ke vwandaka na lweka. Yandi ke bikaka yawu tambula kaka mutindu yina na mwa ntangu fioti. Mpe ya kieleka mu ke kwikila ti yawu yina me salama.

Mpe na bilumbu yayi ya nsuka Nzambi ke monisa pwelele binsweki yayi na Dibuundu. Yandi me salaka yawu ntete ve. Mpe kana Yandi me salaka yawu ve, ya ke samu Dibuundu kulala ve mpe kusambila ntangu nionso, na kuzabaka ve ntangu ya ke salama. Kasi beno bambuka moyo, na Daniel 12, Yandi me tuba, “Muntu ya ndwenga ke bakula na nsuka, na kilumbu ya nsuka.” Beno me mona? Ba me pesa yawu na yandi.

⁶⁸ Mpeve ya ndwenga ke kwisa na Dibuundu, samu na kuzabisa na Dibuundu, na nzila ya luzayikisu ya Mpeve-Santu, na kukotisaka Dibuundu mpe ke monisa pwelele kilumbu yina beto ke na kuzinga. Kaka mutindu Gabriel kwisaka na—na Daniel, Mpeve-Santu ke kwisa na Dibuundu na bilumbu ya nsuka, samu na kumonisa pwelele bima yayi ya nene, ya mudindu, ya kinsweki. Beno me bakula ntangu yayi?

⁶⁹ Ntangu yayi, yawu yina ke katula mvula yina ya astronomie to mvula ya Julien, manaka, beno me mona, mvula ya ba franc-maçon, samu ntoto kele ya kutengama. Beto nionso me zaba yawu, na malongi ya lukolo. Mpe ya kele na lweka, na yina, bambwetete, ke sungama na ndonga ve na ntoto na ntangu mosi. Na yina, manaka ya ba-Romain kele na kifu, diaka, samu beno lenda sungika bilumbu ve. Ya ke na bima mingi mu lendaka tuba kaka awa. Beto ke mona ti, yinza yawu mosi, ke longa beto ti ya ke kaka na bilumbu makumi tatu na mvula mosi.

⁷⁰ Ntangu yayi, beto baka Apocalypse kisika beto ke kwenda kuna na bilumbu ya bapofete zole. Biblia me tuba, “Ba pesaka profesi bilumbu funda mosi na bankama zole na makumi sambanu.” Ntangu yayi, kana beno baka manaka ya astronomie, ya kieleka ya ke vwanda ntama na kusala bamvula tatu na ndambu. Mpe kana beno baka manaka ya ba-Romain yina beto ke na yawu bubu yayi, ya ke vwanda ntama na yawu. Kasi

beno baka manaka ya profesi, mpe ya kieleka ya ke na bilumbu funda mosi na bankama zole na makumi sambanu, na kutangaka bilumbu makumi tatu na ngonda mosi. Beno me mona?

⁷¹ Beto ke na bilumbu makumi tatu na bangonda yankaka, makumi tatu na mosi na ngonda yina ke kwisa, ntangu yankaka makumi zole na nana. Beno me mona, beto ke na nionso ya kuvukisa. Kasi Nzambi ya kele ve yayi na yina, na zulu mpe na nsi, na manima mpe na ntwala. Na Yandi ya ke kaka mutindu yina. Yinga, tata. Ya kieleka mutindu mosi, bilumbu makumi tatu na ngonda mosi; bilumbu makumi tatu na mosi ve, na manima makumi tatu, to kima yankaka. Beno me mona? Kasi yina nionso me salama na économie ya nene ya Nzambi, samu Dibuundu kulandila na kutala mpe kusambila, samu na kukubama, samu na kuvwanda na bilele ya kusukula na Menga ya Mwana-dimeme. Kasi, oh, na bilumbu yayi ya nsuka, Yandi silaka yawu! Uh-huh. Ntangu yayi beto me mona kisika beto ke na kuzinga. Ntangu yayi, beno bambuka moyo, lukanu, lukanu mosi kaka, vwandaka samu na yayi.

⁷² Ntangu yayi, kana ya vwandaka na sambwadi. . . Beno tala, ya kieleka ya vwandaka na bilumbu makumi yiya na yivwa. . . bamvula makumi yiya na yivwa, mu zola tuba, na ntangu ya lutungu ya tempelo. Basabala sambwadi, kele basabala sambwadi ya profesi, basabala sambwadi, samu ya ke na basabala sambwadi yina ba me zenga samu na tempelo, samu na kutunga diaka tempelo. Mpe ba tungaka yawu kieleka na bamvula makumi yiya na yivwa. Ntangu yayi beto ke na lutendulo ya ntangu ya basabala, samu kana Biblia me tuba, Wanzio tubaka, ya me sala basabala sambwadi tii na lutungu ya tempelo. Mpe ya vwandaka kieleka bamvula makumi yiya na yivwa samu na kutunga tempelo, kubanda—kubanda kilumbu ya 14 ya Ngonda ya tatu tii na mvula 5—538 na Ntwala ya Klisto. Tii kuna ba tungaka diaka tempelo, mpe ba tungaka diaka babala-bala, kieleka bamvula makumi yiya. Na yawu, yinki beto me bakula? Yinki beto me bakula? Na yina, kana basabala sambwadi zola kutuba bamvula makumi yiya na yivwa, na yina sabala mosi me fwanana na bamvula sambwadi. Mpe sambwadi bambala sambwadi kele makumi yiya na yivwa. Ya kieleka. Yawu yina.

⁷³ Na yawu ntangu yayi ya ke diaka na bakiuvu ve samu na yawu. Beto me zaba ntangu yayi ti konso sabala zola kutuba bamvula sambwadi. Beno me bakula? Beto tuba kintwadi. [Mpangi Branham na dibuundu ke tuba na kintwadi—Mu.] “Sabala mosi me fwanana na bamvula sambwadi.” Ntangu yayi beto zaba ti beto me bakula yawu. Sabala mosi me fwanana na bamvula sambwadi.

⁷⁴ *Awa* beto me kuma, kisika yango awa, sabala ya ntete. Bamvula makumi yiya samu na kutunga diaka tempelo. Ntangu yayi, nzila yayi awa na zulu yina ke luta ke talisa yinsi ya ba-

Juif. Yayi ke kaka ntangu. Mpe ntangu yawu ke kulumuka awa, ya zola tuba ti beto ke luta na yinsi ya ba-Juif, samu na kukota na ntangu ya Bantu ya makanda. Na manima yawu ke mata diaka samu na kubaka diaka Israël, mpe ya ke kwenda na ntwala.

⁷⁵ Ntangu yayi, Bantu ya makanda ba me zenga ntangu mosi ve samu na bawu. Ya me tuba kaka, “Ntangu ya Bantu ya makanda.” Mpe beto ke mona ti, ata mpe Yesu zengaka ntangu ve samu na bawu. Na yina beto ke mona awa, na Luc 21:24, Yandi tubaka, “Ba ke diata bibaka ya Jérusalem tii kuna Bantu ya makanda. . . .” Mu ke tanga yawu samu na beno. Mu ke tanga yawu kaka na yintu. Beno bika mu tanga yawu, samu ya ke vwanda na bande awa, mpe beto zola ndima ya kieleka ti beto me bakula yawu mbote. Mbote mingi, kana beno zola baka yawu na munu, na Santu Luc 21:24. Mu me longuka yayi mbote-mbote, na mutindu ya kulutila mbote mu lendaka longuka yawu.

Mpe ba ke kubwa na mbele, mpe ba ke nata bawu. . . .

Nani Yandi ke na kutubila? Ba-Juif. Yina vwandaka kubeba ya tempelo, na mvula 70 na Manima ya Klisto.

. . . mpe ba ke nata bawu na kimpika na kati ya bayinsi nionso: . . .

Ntangu yayi beno bambuka moyo, kaka kuna Babylone ve, kaka kuna Rome ve, kasi na “bayinsi nionso.” Ya ke kisika yina ba-Juif kele bubu yayi, na “bayinsi nionso.”

. . . mpe Bantu ya makanda ke yala mbanza nionso ya Jérusalem, tii na kilumbu ya Bantu ya makanda ke lunga.

⁷⁶ Na yina, ya ke na ntangu yina ba me zenga, kasi muntu mosi ve kuzaba ntangu ya ke vwanda. Beno me mona? Ya ke mansweki, beno me mona, ntangu ya Bantu ya makanda. Kasi, ba-Juif. . . . Na yina, beto lenda tuba ntangu ve na kotalaka Dibuundu, kana Yawu ke vutukisa na manima to Yawu ke kwenda na ntwala, to yina Yawu ke na kusala. Beno lenda tuba yawu ve na nzila ya yawu. Kasi, beno tala ba-Juif, ya ke na manaka ya ntangu. Beno me mona? Nzambi me zenga kieleka samu na bawu kilumbu, ngunga, mpe ntangu, kasi Yandi me sala yawu ata fioti ve samu na Bantu ya makanda. Yandi me sala yawu samu na ba-Juif, na yawu beto tala ba-Juif, na yina beto ke mona kisika beto kele.

⁷⁷ Ntangu yayi, ntangu yayi, basabala sambwadi vwandaka bamvula makumi yiya na yivwa. Beto me bakula yawu mbote ntangu yayi, ti sabala mosi kele—sabala mosi kele bamvula sambwadi; sabala mosi, bamvula makumi yiya na yivwa.

⁷⁸ Ntangu yayi ba me tuba na beto, “Kubanda nsamunu ya ndinga. . . .” Ntangu yayi, beno tala kisika mpasi kwisaka. Ntangu yayi ba me tuba na beto:

. . . *kubanda nsamunu ya ndinga samu* kutunga diaka mbanza tii na Mesiya (mpe Mesiya vwandaka Klisto, ya kieleka) *ya ke vwanda na basabala sambwadi, mpe basabala makumi sambanu na zole:* (ya ke sala basabala makumi sambanu na nana) . . .

Beno me mona? Mbote mingi. Mpe sambwadi mbala makumi sambanu na nana ke sala bamvula bankama yiya na makumi nana na tatu. Ntangu yayi, beno ke na kusonika yawu? Kana beno zola ti mu vutukila yawu diaka, mu ke sepela na kusala yawu.

⁷⁹ Ntangu yayi ba me tuba na beto, “Kubanda nsamunu ya ndinga samu na kutunga diaka mbanza, tii na Mesiya, ya ke vwanda sambwadi,” (sambwadi, yayi kele ya ntete—ya ntete, awa) “basabala sambwadi, mpe makumi sambanu na zole,” ke sala, makumi sambanu na zole na sambwadi kele makumi sambanu na yivwa, basabala makumi sambanu na yivwa. Sambwadi mbala makumi sambanu na yivwa ke sala bamvula bankama yiya na makumi nana na tatu. Na yina, tii na Mesiya . . . Ntangu yayi beto me kuma na kitini yayi *awa*. Tii na Mesiya, ya ke vwanda na bamvula bankama yiya na makumi nana na tatu, bamvula bankama yiya na makumi nana na tatu.

⁸⁰ Ntangu yayi, ntangu yayi, Yesu, Mesiya, kotaka na mbanza ya Jérusalem, na lunungu, na zulu ya mulet ya mpembe, na Lumingu ya Ndala, na kilumbu ya 2 ya Ngonda ya yiya, na mvula 30 na Manima ya Klisto. Yesu kotaka na Jérusalem na Lumingu ya Ndala, na mvula 30 na Manima ya Klisto. Mpe ntangu yayi, ntangu yayi, kubanda mvula 445 na Ntwala ya Klisto tii na mvula 30 na Manima ya Klisto, kele kieleka bamvula bankama yiya na makumi sambwadi na tanu.

⁸¹ Kasi, mutindu beto me mona ntete, ti basabala makumi sambanu na yivwa ke sala bamvula bankama yiya na makumi nana na tatu. Ntangu yayi, ya ke kisika yina mpasi ke kwisa, kaka kuna. Beno me mona? Beto kele kaka, kana beto tula ntima na Biblia awa, ntangu, kaka bamvula bankama yiya na makumu sambwadi na tanu. Mpe, ntangu yayi, ya kele bamvula bankama yiya na makumi nana na tatu, luswaswanu ya bamvula nana.

⁸² Ntangu yayi, Nzambi lenda lembana yawu ve. Kana Yandi me tuba ti ya ke vwanda bilumbu mingi, ya ke vwanda bilumbu mingi. Kana Yandi me tuba tii na kisika yina, ya ke tii na kisika yina. Na yawu yinki beto ke sala? Ntangu yayi, kubanda mvula 475 na Ntwala ya Klisto tii na mvula 30 na Manima ya Klisto, ya kele bamvula ya Julien to ya astronomie, yina kele na bilumbu nkama tatu na makumi sambanu na tanu mpe mosi na zulu ya yiya mosi na—na yankaka. Kasi ntangu beto ke kulumusa bilumbu yina na manaka ya beto ya profesu . . .

⁸³ Ntangu yayi beno bika mu telama awa na mwa ntangu fioti. Na yina beno ke bakula kukondwa ntembe, ti mu me baka kaka

kisika mosi ve. Mu lenda baka yawu na kati ya Masonuku nionso mpe kusiamisa na beno ti bilumbu sambwadi kele ti sambwadi, sabala mosi kele—kele bamvula sambwadi, na kati ya Biblia. Mu me sala yawu awa, ntangu mu me baka Apocalypse kapu 13, to kapu 11 mpe nzila ya 3. Baprofete yina ke pesa profesi bilumbu funda mosi na bankama zole na makumi sambanu, yina kele na kati-kati ya sabala ya nsuka ya ba-Juif, na manima ba ke katula bawu mpe Harmaguédon ke banda. Na yina kana ya ke mutindu yina, ya kele diaka, bilumbu makumi tatu na ngonda mosi. Beno me mona? Na yina, ya kele—ya kele ve bilumbu makumi tatu na mosi na makumi zole na nana, mpe nionso yina. Ya kieleka ya ke bilumbu makumi tatu na ngonda mosi, konso ntangu.

⁸⁴ Manaka ya beto ya profesi ke nata beto na bilumbu nkama tatu na makumi sambanu, mutindu yina beto ke sadila ntangu yayi na Masonuku. Beto kele kieleka na bankama yiya na makumi nana na tatu. Tala, bankama yiya na makumi nana na tatu. Awa beto kele kieleka na kidimbu ya profesi, nionso ya kieleka. Na yina, kubanda ntangu ya nsamunu ya kutunga tempelo, tii na kubeba, ntangu bawu losaka Klisto mpe bawu kufwaka Yandi na mvula 33 na Manima ya Klisto, ntangu bawu kufwaka Klisto, ya ke sala kieleka bamvula bankama yiya na makumi nana na tatu.

Ntangu yayi, kubanda nsamunu ya ndinga ya kutunga diaka Jérusalem, ba zengaka basabala sambwadi, yina zola tuba bamvula makumi yiya na yivwa. Mpe bamvula makumi yiya na yivwa ke fwanana na yawu ya kieleka. Mbote, kubanda ntangu lutungu ya tempelo tii na Mesiya, ya vwandaka na bamvula bankama yiya na makumi tatu na nana. Na yina, bankama yiya na makumi ta- . . . bamvula bankama yiya na makumi tatu na yiya. Mpe bankama yiya na makumi tatu na yiya (mbala), makumi yiya na yivwa, ke sala kieleka bamvula bankama yiya na makumi nana na tatu. Ya ke fwanana na nionso, na kilumbu mosi, na kilumbu mosi na yankaka. Amen! Yawu yina.

⁸⁵ “Mesiya Ntinu ke kwisa.” Beno me mona? Sambwadi mbala makumi sambanu na yivwa kele bankama yiya na makumi ta- . . . na—na bamvula makumi nana na yiya. Ya kieleka, ya ke fwanana na nionso. Na yina, na manima, beto me zaba na mutindu ya kulunga, beto me zaba ya kieleka, ti Disonuku yina kele ya kusungama. Yawu yina. Kasi, beno me mona, nionso yayi. . .

⁸⁶ Ntangu Nzambi bebisa yinza na masa na ntangu ya ntama, mpe sobaka kilumbu ya bantu ya astromie; mpe na manima Yandi bikaka ba-Romain kukwisa sala manaka ya bawu, yina ke vwanda mbote na kisika mosi mpe ya ke dumuka kuna, mpe nionso. Mpe mu banza, ti, ata mpe na encyclopédie kisika mu vwandaka tanga.

⁸⁷ Mpe, na kuluta, Mpangi Kenny Collins, kele na kati ya

yinzo yayi na suka yayi, Kenneth Collins? Nge zaba ntangu nge tindaka munu kinkunku yina ya nene ya ba-encyclopedia? Nge ke bambuka moyo na yawu? Nge tindaka munu tomabilu ya muvimba ya kifuluka na yawu. Mu banzaka, “Yinki mu ke sala na nionso yayi muntu ya kukondwa mayele mutindu munu?” Nge zaba, Mfumu vwandaka twadisa nge, Kenny. Ya kele kuna mu me kuzwa bansangu, kuna na encyclopédie yina ya ntama, “ntangu,” mu vwandaka tanga yawu. Mpe Becky ke sadilaka yawu na lukolo ya yandi. Mu me tulaka yawu na bureau ya munu, na nsi kuna na cabinet ya munu. Mpe beto kulumukaka kuna mpe beto me basisa yawu, mpe beto vwandaka sosa yawu kuna, mpe beto me mona yawu, ya kieleka, na bamanaka mpe bantangu nionso me vwandaka ntete ve. Beno me mona? Na yawu, beto me kuzwa yawu.

⁸⁸ Yawu yina, ya kieleka, bamvula bankama yiya na makumi nana na tatu. Kubanda nsamunu ya ndinga ya kuvutula—kuvutula lutungu, tii na ntangu ya Ntinu Mesiya me losama, ya ke sala kieleka bamvula bankama yiya na makumi nana na tatu, na manaka.

⁸⁹ Ntangu yayi beno me mona, beto ke sadila manaka yayi awa mpe. Samu, kana Nzambi sadilaka manaka yayi awa, na yina Yandi fwana sadila yawu na ntangu nionso me bikala na kati ya Biblia. Ya kieleka? Nzambi ke sobaka ve. Na yina, kana basabala sambwadi vwandaka bamvula makumi yiya na yivwa. Sabala mosi kele bamvula sambwadi, beno me mona, na yina ya ke sala ti ya vwanda kaka ya kulunga. Mpe kana ya me fwanana na yawu na nionso kuna, ya kieleka ya ke fwanana na yawu diaka na nionso. Amen! Oh, la la! Yina ke yangidisa munu kaka. Oh, mu—mu ke zolaka mu ke zolaka kuzaba yina mu ke na kutuba. Mu—mu—mu ke zolaka yawu.

Samu, mutindu mpangi yina ya kiboba tubaka, na munu, kuna na Kentucky, yandi tubaka, “Mu ke zolaka kuwa muntu kutuba, yina me zaba yina yandi ke na kutuba.”

Mu tubaka, “Munu, mpe.”

Yandi tubaka, “Yawu yina diambu na beno milongi, beno me zaba ve yina beno ke na kutuba.”

⁹⁰ “Mbote,” mu tubaka, “Mu me sepela na bandinga ya nge, kasi ya ke na bima yankaka yina beto me zaba yina beto ke na kutuba.” Uh-huh. Ya kieleka. Mu me zaba ti mu me butuka mbala ya zole. Mu me zaba ti mu me luta na lufwa tii na Luzingu. Mu me zaba ti Nzambi kele, samu mu me tubaka na Yandi.

Yandi tubaka na kati ya munu, mpe Yandi tubaka na munu, mpe Yandi tubaka na bantu yankaka, mpe Yandi tubaka na munu mambu samu na bantu yankaka. Mpe mu zaba ti Yandi kele Nzambi. Ya kieleka. Yandi vwandaka na lutondo mingi na kukulumuka mpe Yandi kubaka foto na munu, yayi yinza ya bantu ya mayele lenda manga yawu ve. Mpe mu bakaka

Masonuku mpe mu me mona ti ya ke ya kieleka samu na kulungisa nsungi yayi ya dibuundu, ya kieleka yina ke na kusalama, na yawu mu me zaba ti beto kele awa. Amen.

⁹¹ Ntangu yayi, beto lenda vwanda me longukaka ve. Beto lenda vwanda bantu ya mfunu mingi ve, mpe bima ya mutindu yina. Beto lenda vwanda bantu ya lukumu ve, kasi beto me zaba Nzambi. Beto me zaba Yandi samu ya ke na Mpeve-Santu, beno me mona, mpe ya ke fwanana Ndinga-na-Ndinga na kati ya Masonuku, na yina beto me zaba ti ya ke ya kieleka. Beto ke na kuzinga na bilumbu ya nsuka.

⁹² Ntangu yayi, na yina, beno bambuka moyo ntangu yayi, ti, mvula yayi ya profesi, kele na bilumbu bankama tatu na makumi sambanu na mvula mosi. Beno tala kima yankaka nionso. Yinza, kana bayankaka na kati ya beno lenda bakula, ata mpe beno bakento, mpe nionso yina. Beno me mona? Makumi tatu, bilumbu makumi tatu, beno me mona ya ke—ya ke . . . Yinza ya muvimba me salama mutindu yina. Beno me mona? Makumi tatu na mosi ve, makumi tatu, makumi zole na nana, to kima mosi. Ya kieleka ya ke bilumbu makumi tatu. Na konso mvula, ya ke manaka ya profesi, ya kele bilumbu bankama yiya na makumi nana na tatu.

⁹³ Awa beto ke na kidimbu ya kieleka ya profesi, bamvula bankama yiya na—na makumi yiya na tanu, na ntwala, ya vwandaka nionso ya kieleka. Ntangu yayi, yina nionso ba tubaka na profesi ti ya ke salama. Mpe basabala makumi sambwadi yina me lungaka ata fioti ve na ntangu yina, na yina yawu bikalaka samu na bilumbu ya nsuka ntangu yayi.

⁹⁴ Ntangu yayi, bampangi ya munu ya ba-Pentecotiste; ntangu yayi, bampangi ya munu ya Bambangi ya Yehowa; beno me bakula? Beno me zaba kisika nkama mosi na makumi yiya na yiya ya mafunda me monana? Beno me zaba kisika bimangu nionso ya nene ya Apocalypse me monana? Kuna na nsunga ya ba-Juif, na nsungi ya beto ve. Ba me tubila kima mosi ve samu na yawu, kaka Dibundu ke na kukubama mpe ke kwenda. Ya kieleka, na ngolo ya Nzambi, beto ke sala bimangu na mambu ya nene. Beto me zaba yawu. Kasi kima ya kieleka vwandaka ya ke kuna na ba-Juif; mu zola tuba, ngolo ya kieleka, yina ke sala kisalu, yina ke sala bimangu. Yiya . . .

⁹⁵ Nkama mosi na makumi yiya na yiya ya mafunda ke monana kuna ve. Ba kele kuna . . . Ba ke monana ve na kapu 3. Ba kele ntama kuna na Masonuku, na manima. Mpe ntangu yayi beno me mona ti bima yayi nionso yina zolaka salama, vwandaka kuna na ntangu yayi ya sabala ya sambwadi, sabala ya nsuka. Ntangu yayi, kana ba vwandaka ntete na basabala makumi sambanu na yivwa, mpe ba zingaka yawu kieleka mutindu Nzambi tubaka ti ba ke sala, mpe ya me salama kieleka mutindu Nzambi tubaka ti ya lendaka salama, na yina ya me bikala diaka na sabala mosi

yina ba silaka na ba-Juif. Ntangu yayi, bampangi, beno kubama. Beno me mona? Beno me mona? Beno kuwa wapi mutindu beto me kuma pene-pene. Sabala ya nsuka, sambwadi, mvula ya sambwadi.

⁹⁶ Ntangu yayi, bantu nionso ke bakula tii na kisika yayi, kana beno me bakula? Bantu nionso me bakula tii na kisika yayi, ya kele Kieleka ya kulunga. Ya ke Biblia. Ya kele bamvula ya profesi.

⁹⁷ Ntangu yayi beto me kuma kuna, mpe beto me landila tii na ntangu yina ba losaka Mesiya, beno me mona, kubanda . . . tii na ntangu yina ba losaka Mesiya, sabala ya nsuka.

⁹⁸ Ntangu yayi, mu ke zola kutelama awa kaka na mwa ntangu fioti samu na kutendula yayi. Ti, ntangu ba losaka Mesiya, ya vwandaka ntangu bawu, ya kieleka, losaka Yesu mutindu Mvulusi, mpe ba komaka Yandi na kulunsi. Beno bambuka moyo na yina Biblia me tuba kuna, “Mpe ba ke katula Yandi, kasi samu na Yandi mosi ve, Mesiya, Ntinu.” Ntangu yayi beno banza wapi mutindu profesi yina me salama na mutindu ya kulunga. Mu zola kotisa yayi na kati ya yintu ya beno. Ti, kana profesi yina me salama na kilumbu ya kieleka, na ntangu ya kieleka, mpe ya kieleka mutindu ba tubaka ti ya ke vwanda; yayi yankaka ya sambwadi, basabala sambwadi yayi me bikala . . . bamvula sambwadi yayi, mu zola tuba, (bilumbu sambwadi: bamvula sambwadi), ke salama ya kieleka landila Masonuku.

⁹⁹ Ntangu yayi, beno bambuka moyo, ba katulaka Yandi, Mesiya. Ba-Juif, Nzambi sukisaka na kusala na bawu. Ba lendaka kwenda ntama ve. Na yina ba panzaka bawu na Kimfumu ya Rome. Mpe, na yina, kana beno tala mbote na schema ya munu, mu ke zola ti beno bakula yawu ntangu yayi mpe beno yema yawu. Beno me bakula awa kisika mu me tula kulunsi? Ya ke kisika yayi ba losaka. Kasi ntangu kwendaka mwa ntama fioti kuna, beno me mona. Samu na yinki? Makumi tatu, makumi yiya, makumi tanu, makumi sambanu, makumi sambwadi. Bamvula makumi yiya na ntuala, Titus, général Romain, bebisaka Israël, Jérusalem, mpe panzaka bantu na yinza ya muvimba. Beno me mona, Titus, bamvula makumi yiya na ntuala. Na yawu, ntangu yayi, ntangu ya ba-Juif landilaka tii ya muvimba . . .

¹⁰⁰ Nzambi vwandaka sala diaka na bawu ve. Yandi salaka na bawu kaka tii na ntangu ba losaka Klisto. Na yina ntangu ba komaka Klisto na kulunsi, ba bokaka, “Bika ti Menga ya Yandi kubwa na zulu ya beto mpe bana ya beto,” mpe yawu yina salamaka kubanda kilumbu yina. Kasi na ntuala ba panza bawu . . . Beno kuwa! Oh, mpangi-bakala! Na ntuala ba panza bawu nionso na yinza ya muvimba, ya lombaka na Nzambi bamvula makumi yiya samu na kupanza bebisa tempelo mpe

kupanza bawu na yinza ya muvimba. Kasi Nzambi salaka na bawu diaka ve. Nzambi salaka na bawu diaka ve.

Yandi kwendaka sala na Bantu ya makanda. Beno me zaba yawu, beno me bakula yawu ntangu yayi? Ntangu yayi, awa beto me banda bansungi ya dibuundu, ntangu ya Bantu ya makanda, Nzambi kele diaka ve na ba-Juif.

¹⁰¹ Ntangu yayi mpangi ya munu ya bakala ya missionarye, yina vwandaka kuna na—na—na ba-Juif, mpangi-bakala mosi ya ntalu ya luzolo yina kele awa kisika mosi kuna. Awa ke kisika mu zola ti beno simba mpe beno bakula. Beno me mona, Nzambi bikaka na kusala na ba-Juif kaka kuna, samu Nzambi ke salaka na Israël mutindu yinsi. Beto nionso me zaba ti Israël kele yinsi mosi. Bantu ya makanda kele nkonga ya bantu, mpe ya lombaka ti Yandi basisa bantu na kati ya Bantu ya makanda, samu na Nkumbu ya Yandi. Beto ke tubila yawu na mwa ntangu fioti.

¹⁰² Kasi ntangu yayi, na bansungi sambwadi yayi ya dibuundu yina beto me katuka na kumona, ntangu ya Bantu ya makanda, kubanda ba komaka Klisto na kulunsi tii na nsuka ya bansungi ya dibuundu. Ntangu yayi beto me mona yawu. Beto me longuka yawu, kubanda nsongi na nsongi. Ntangu yayi beto ke na kwenda na kisika yina beto lenda mona yayi, beto lenda kota na Bidimbu Sambwadi, Bambungu Sambwadi, Bampungu Sambwadi, mpe nionso yina, mpe kubaka dibanza ya yawu nionso; nionso yina me tala ba-Juif, mpe lusambusu ya Nzambi na bantu na zulu ya ntoto. Mpe ndambu yina . . .

¹⁰³ Beno bambuka moyo, na ntangu yayi ya nene ya bampasi, ya ke vwanda na mafuku ya Bantu ya makanda ke kufwa kuna. Kento ya makwela yina ba me losa, ndambu yina—yina ya nkuna ya kento, mwense yina ya kulala, yandi ke luta na kati ya yawu. Ya ke—ya ke pwelele kaka mutindu basabala makumi sambwadi yayi; pwelele kaka. Mpe ba ke luta na kati ya yawu. Na yawu, kana beno ke na Mpeve-Santu ve, kulutila mbote beno kuzwa Yawu na nswalu nionso. Beto me kuma na nsuka ya ntangu.

¹⁰⁴ Ntangu yayi beno tala, bansungi sambwadi ya dibuundu. Ntangu yayi, mu ke tubila yawu ve, samu beto ke na yawu na bande, mpe ba ke tula yawu na babuku mpe nionso yina. Ti, ya vwandaka ntangu yina Nzambi tubaka ata fioti ti ya ke vwanda na bilumbu mingi, bangunga mingi, to bamvula mingi; Yandi tubaka ata fioti ve kima mosi. Yandi tubaka, “Tii ntangu ya Bantu ya makanda ke mana.” Yandi tubaka, “Tii!” Ba ke diata bibaka tii kuna Nzambi ke manisa na kusala na Bantu ya makanda.

¹⁰⁵ Ntangu yayi, beto me mona ti, na kati ya bansungi yayi, beto me kuzwa Mpeve-Santu yina kwisaka. Na manima Nzambi, kuna na mbandukulu, bandaka na kutuba na ntangu yina, na kulosama ya Klisto, Nzambi talisaka na Jean kieleka yina zolaka kusalama na ntangu ya luyalu ya Bantu ya makanda. Ntangu

yayi, beno me mona, beto ke na ntangu yina ba me zenga samu na beto ve, mutindu ba-Juif, kasi beto ke na kidimbu mosi. Beto ke na—beto ke na kidimbu ya dikunzi. Mbote, Nzambi salaka na ba-Juif kaka kieleka yina Yandi tubaka ti Yandi ke sala na bamvula makumi sambanu na yivwa yayi, to, ya vwandaka bamvula bankama yiya na makumi nana na tatu, kasi basabala makumi sambanu na yivwa. Mpe sabala mosi me bikala, ba me zenga diaka sabala mosi.

¹⁰⁶ Ntangu yayi, beto lenda tula yawu *awa* ve, samu yayi kele Bantu ya makanda, Dibuundu. Ntangu yayi, bantu yikwa ke na kubakula yawu? [Dibuundu me tuba, “Amen.”—Mu.] Ntangu yayi, ya ke na Apocalypse, kubanda na kapu ya 1, tii na kapu ya 3 beto kele na Laodicée. Ntangu yayi, beto me mona kieleka ti nionso yayi vwandaka Dibuundu, yinza ya Dibuundu yawu mosi. Nzambi kotisaka disumu ata fioti ve, yandi . . . kaka kana yandi zola kuvuluka. Kasi, yinza ya Dibuundu vwandaka nionso ya mpembe; na manima kwisaka ba-Nicolaïte yina zolaka kusala organisation. Bantu ya lukumu kotaka na yawu. Yayi vwandaka na Nicée, na Rome, ntangu bawu salaka Concil ya Nicée. Mpe yinki bawu salaka? Bawu salaka organisation na dibuundu, na manima bawu bandaka na kutalisa mpasi na Dibuundu. Na manima, na nsungi ya dibuundu yina landaka, na yina, Buklisto, na yina me tala mbotika ya Mpeve-Santu, vwandaka ya muvimba ya kuvwanza.

¹⁰⁷ Kasi na yina, beno awa me zaba, ti mu kwendaka tanga masolo, *Batata Ya Nicée*, mpe *Batata Na Ntwala Ya Nicée*, mpe masolo nionso ya dibuundu, mpe mukanda ya kulutila ntama yina mu lendaka kuzwa, mpe bawu nionso me siamisa na munu ti Dibuundu yina Nzambi vwandaka tubila vwandaka ve dibuundu ya Catholique ya organisation to organisation yankaka ve. Nzambi vwandaka tubila, mpe bambwetete nionso yina ya nene ya nsungi, vwandaka babakala yina longakaka mbotika ya Mpeve-Santu, mbotika na Nkumbu ya Yesu Klisto, mpe nkwezulu ya Mpeve ya Nzambi, mpe—mpe kutuba na bandinga, mpe ntendulu ya bandinga, mpe kubeluka ya nzutu mpe bimangu, mpe bidimbu. Yawu yina Nzambi ke pesa. Yandi lenda soba dibanza ya Yandi ve, kutuba, “Mbote, yayi kele dibanza ya munu ya Dibuundu, Dibuundu ya bantumwa; ntangu yayi dibanza ya Munu kele dibuundu ya bantu ya lukumu.” Nzambi ke sobaka ve! Ya kele kaka Mpeve-Santu.

¹⁰⁸ Mpe beto ke tala yawu mpe beto ke nata yawu, na yina, ntangu beto ke mona nkadulu ya Nzambi mpe yina Yandi . . . na manima beto ke talisa Masonuku ya Yandi. Na manima beto ke baka masolo yina ke talisa ti ya me salaka kaka kieleka kukondwa kukatula; na kilumbu ya kieleka, na ntangu ya kieleka, yina nionso Nzambi tubaka na nzila ya Jean, ke salama, ya me salama na nsungi yina ya Bantu ya makanda.

¹⁰⁹ Ntangu yayi, beto kele, kukondwa ntembe, na Nsungi ya

Laodicée. Beto me zaba ti ya kieleka. Beto me luta na Nsungi ya Luther; beto me luta na nsungi ya nsungi ya Wesley; ntangu yayi beto kele na Nsungi ya Laodicée, nsungi ya nsuka. Mpe beto me mona ti mabuundu nionso yina vwandaka na munati nsangu. Beto me mona yawu. Bambwetete sambwadi na diboko ya Yandi, yina vwandaka Bampeve Sambwadi yina basikaka na ntwala ya Nzambi. Nionso vwandaka na munati nsangu. Mpe beto me landila mpe beto me mona, na nzila ya Biblia, yina ke vwandaka nkadulu ya munati nsangu yina, nkadulu yina munati nsangu yina ke vwanda na yawu. Mpe beto ke tala muntu yina vwandaka na nkadulu yina na kati ya masolo. Na manima ntangu beto ke mona muntu yina na kati ya masolo, yina vwandaka na nkadulu yina, beto ke mona ti yandi vwandaka munati nsangu ya nsungi ya dibuundu yina. Na manima beto me mona yinki Mpeve, mpe yina muntu yina salaka. Mpe beto me mona ti yandi vwandaka santu yina vwandaka ya kufuluka na Mpeve-Santu, Santu Iréné, mpe bayankaka nionso, mpe—mpe Santu Colomba, mpe bantu yankaka nionso ya kufuluka na Mpeve. Mpe beto me zaba ti, na nzila ya Masonuku, ti mutindu ya Mpeve yina lendaka vwanda na zulu ya muntu ya mutindu yina samu na ntangu yina. Yawu yina, na yawu ya lendaka vwanda ya luvunu ve! Amen! Nkembo na Nzambi! Ya ke kaka . . .

¹¹⁰ Mu zaba ve, mpangi-bakala. Ya ke sala mingi samu na munu kulutila bima nionso mu me zaba, beno me mona, samu ya kele Ndinga ya Nzambi ke na kutuba Yawu mosi. Ntangu mu ke kuwa Nzambi ke tuba kima mosi, mu ke tuba, “Amen! Ya kieleka. Ya kieleka.” Beno me mona? Ya ke sukisa diambu. Yimeni. “Nzambi me tuba mutindu yina.” Na yina, yimeni.

Mbote, Nzambi tubaka ti ya ke salama mutindu yina, mpe beto me mona yawu na kati ya masolo mpe na nzila ya Masonuku. Beto me tanga samu na nsungi yayi ya dibuundu, yina ya ke sala, yina ke salama, wapi mutindu ya munati nsangu ya vwandaka samu na nsungi yina ya dibuundu. “Na—na wanzio ya dibuundu ya Laodicée. Na wanzio ya dibuundu ya Sardes, Thyatire,” yayi nionso ya luswaswanu. Mpe beto me vutuka na masolo samu na kumona munati nsangu ya dibuundu yina, mpe beto me mona nani ya vwandaka. Na manima beto me yema yawu, beto me tula bankumbu ya bawu na nsi, mpe bawu yina. Beno me mona, beto me zaba ti ya vwandaka ya kieleka.

¹¹¹ Ntangu yayi, mpe beto me zaba ti Nzambi vwandaka, mpe ke vwandaka ntangu nionso, mpe ke vwandaka kaka ntangu nionso, mpe ke teleminaka nsambulu ya organisation. Yinga, tata. Yandi tubaka yawu. “Ba-Nicolaïte, yina mu ke yinaka!” *Nickao* zola kutuba “kuyala bandimi.” *Bandimi* kele, bandimi kele, “dibuundu, nzutu.” *Nickao* zola kutuba “kuyala, kununga,” na nonzolo yankaka, “kusala muntu ya santu, muntu mosi na zulu ya muntu yankaka.”

Beto nionso kele bana. Beto kele na Ntinu mosi, ya kele

Nzambi. Beto kele na Mosi ya Santu, mpe ya kele Nzambi. Amen! Mpe Yandi kele na kati ya beto, na mutindu ya Mpeve-Santu. Ya kele Mosi yina kele ya Santu.

¹¹² Ntangu yayi, beto me kuma na kisika ya kundima ti na kulandaka nsungi ya ba-Juif beto me mona ya kieleka basabala makumi sambanu na yivwa, na nzila ya masolo, na nzila ya manaka, na nzila ya mvula ya profesu ya Nzambi, beto me landila disolo ya manaka ya profesu, kubanda Ngwisani ya Ntama tii na Malu-malu, mpe beto me talisa ti ya kieleka ya ke mutindu mosi. Beno me mona?

Ntangu yayi beto me mona dibuundu ya Bantu ya makanda kubanda na mbandukulu, tii na kilumbu ya nsuka, mpe beto me zaba ti beto ke na kuzinga na kilumbu ya nsuka. Amen! Beno me bakula? [Dibuundu me tuba, "Amen."—Mu.] Ntangu yayi, na yina, kana beto ke na kuzinga na kilumbu ya nsuka, na yina wapi sika beto kele?

¹¹³ Beno tala, na manima awa, beno ke mona nzila yayi ya kutenda *awa*, kisika Nzambi salaka na ba-Juif. . . To, salaka ata fioti ve na ba-Juif, ya bakaka Yandi ntangu ya yinda na kunata bawu. Ya bakaka Yandi bamvula makumi yiya samu na kunata bawu na mutindu yina Yandi ke sala ti ba bebisa bawu, na bayinsi nionso. Bisika nionso, na bilumbu ya Bantu ya makanda, Yandi fwanaka nata bawu na mutindu yina na ntwala Yandi nata Ndinga ya Yandi kusalama. Beno me mona yina mu zola kutuba? Bayina nionso me bakula yawu, beno tuba, "Amen!" [Dibuundu me tuba, "Amen!"—Mu.] Beno me mona, mu zola ndima ya kieleka ti beno me bakula yawu.

¹¹⁴ Ntangu yayi yinki me salama? Beno tala na nsongi ya nsungi yayi ya nsuka ya dibuundu. Beno me mona mwa kubendama yayi? Bilumbu ya Bantu ya makanda me mana. Mpe samu na bamvula makumi yiya ya nsuka, ba-Juif vwandaka vutuka na Jérusalem, ba vwandaka vutuka na yinsi ya bawu. Alleluia! Beno me mona kisika beto kele? Ya me baka bamvula makumi yiya, kubanda ntangu ba me katula Mesiya, tii ntangu Titus bebisaka tempelo mpe panzaka ba-Juif. Ya vwandaka na bamvula makumi yiya yankaka yina Nzambi kumisaka ngolo ntima ya ba-Pharaon ya mutindu nionso bisika nionso, mpe vutulaka ba-Juif na yinsi ya bawu. Kasi bubu yayi ba ke na kuvutuka diaka na yinsi ya bawu, mpe Dibuundu me kuma na nsuka. Amen! [Mpangi Branham me vwanda pima—Mu.] Oh, mu—mu—mu ke na kumeka kaka na kutanga; mu lenda ve.

¹¹⁵ Beno tala, ba-Juif kele na yinsi ya bawu, mpe ba ke na kuvutuka. Kana beno baka *Nsuka Ya Mvita Ya Zole Ya Yinza Ya Muvimba*, kitini ya zole, ntangu Général Allenby, na manima ya Mvita Ya Zole Ya Yinza Ya Muvimba, pumbukaka na zulu ya Jérusalem mpe botulaka yawu, mpe bakaka Jérusalem. Mpe babakala yina ya Baklisto katulaka bayimpu

ya bawu samu na kukota na Jérusalem. Mpe Allenby ziungaka kwendaka kukondwa kubula munduki, to—to, bayina kwendaka na Allenby, ba-Turcs. Mpe kubanda ntangu yina, Nzambi kumisaka ngolo ntima ya Mussolini, ntima ya Hitler, ntima ya Stanlin, bantina ya bantu bisika nionso na kati ya yinsi, samu na kuyina ba-Juif.

¹¹⁶ Na manima bandeke ya nene yina kulumukaka, yina ba bokilaka Eastern Airlines, to Pan American Airlines, to nionso yina ya vwandaka. Mu ke kwikila ti ba bokilaka yawu TWA. Ya vwandaka na magazine, magazine *Life*, mu banza ya vwandaka, *Look to Life*. Mu banza ti ya vwandaka *Life*. Kaka na bamvula tatu to yiya ya nsuka, mpe Nzambi vwandaka vutula ba-Juif na yinsi ya bawu, wapi bawu vwandaka ntama ya yawu bamvula mafunda zole, na yina Bantu ya makanda vwandaka kubama. Mpe ntangu yayi Bantu ya makanda me basisa Klisto na nganda ya dibuundu, landila Apocalypse kapu 3. Yandi lenda vutuka ve na dibuundu ya Yandi. Ya ke na kisika ve Yandi lenda kwenda. Ba me losa Yandi.

¹¹⁷ Mpe yayi ke ntangu ya Enlevement. Bantu yina nionso ba me kukuula na kati *awa*, bamatonzi yayi ya fioti awa, kele kumata ya basantu na mvumbukulu. Beno me mona, beto nionso me kutana kintwadi *awa*. Biblia me tuba, “Beto bantu ke zinga mpe ke bikala samu na nkwizulu ya Mfumu ke tekila ve to beto ke pekisa ve bayina kele ya kulala.” Bisika nionso *awa*, *awa*, mpe *awa*.

¹¹⁸ Wapi mutindu, mpangi ya munu ya Pentecotiste, wapi mutindu nge lenda tula bawu awa na Nsungu ya Dibuundu ya Laodicée?

Ba kele—ba kele ya kulala, na kati ya bansungi yayi nionso, ba ke na kuingila. “Mpe beto yina ke na kuzinga, mwa nkonga yina ya fioti awa, ndambu yina ke vwanda ya moyo tii. . . Nkwizulu ya Mfumu ke pekisa ve bayina ke lala; samu mpungi ya Nzambi ke bula, mpe bantu yina kufwaka kati na Klisto ke vumbuka ntete; mpe beto ke zanguka kintwadi na bawu.” Amen! “Na bawu,” beto kele *awa*, beto ke kutana *awa*, “samu na kukutana na Mfumu na mipepe.” Mpe yawu yina. Wapi kisika beto kele? *Awa* kaka. Wapi kisika ba katulaka Mesiya? Ya kieleka kisika yina Ndinga tubaka. Wapi sika sabala yina ya sambwadi ke banda? Kaka na manima ba me katula Dibuundu. Na manima Nzambi ke vutuka na ba-Juif.

¹¹⁹ Beno ke bambuka moyo ve? Ya kele kaka na ntangu Dibuundu me kwenda. Dibuundu ke kwenda, na manima ya ke ntangu ya ba-Juif, ba ke kota. Kasi, ntete, kima ya kulanda ke kwisa, ya kele ve reveil ya yinsi ya muvimba—ya yinsi ya muvimba na kati ya Bantu ya makanda. Kima ya kulanda ke salama, kele nkwizulu ya Kimfumu ya Nzambi, Nkwizulu ya Klisto.

¹²⁰ Ntangu yayi, kana beno zola yawu, beto lendaka vutuka awa na Daniel kapu 2, nzila ya 34 mpe nzila ya 35. Mpe ntangu Daniel kuzwaka . . . kapu 2, 34 mpe 35, ntangu Daniel kuzwaka vision ti bilumbu ya bantu ya yandi kumaka na nsuka, mpe samu na ntangu mosi, mpe yandi monaka Bantu ya makanda ke kota. Mpe yandi monaka na vision ditadi yayi ya nene awa, to kifwanisu yayi ya nene, yina vwandaka na yintu ya wolo, mpe ntulu ya palata. Beno tala ntangu yayi, ya me kuma ngolo mingi, palata na wolo. Kima ya kulanda, mipende ya kisengo . . . to mipende ya airain. Mpe bitambi mpe makulu ya kisengo. Kasi misapi, ya vwandaka na misapi kumi, mpe misapi yina vwandaka ya kisengo mpe ya ntoto. Mpe yandi tubaka, “Mutindu nge me mona ti kisengo lendaka vukana ve na ntoto, bimfumu yayi ke kabwana ba ke vukana ve mosi na yankaka, kasi ba ke vukisa bankuna ya bawu kintwadi, na kusosaka na kubuka ngolo ya mosi na yankaka.” Beno me mona?

¹²¹ Ntangu yayi, yinki salamaka, yintu ya wolo vwandaka Nebucadnetsar, mutindu yandi tendulaka yawu. Yandi tubaka, “Ntinu yankaka ke kwisa mpe yandi ke vwanda na nsi ya nge,” yina vwandaka Darius, kimfumu ya ba-Medes na ba-Perses, yina bakaka kimfumu ya Bantu ya makanda. Yankaka kwisaka, na manima ya ba-Medes na ba-Perses, yinki ya vwandaka? Ba-Grecs, Alexandre le Grand, mpe nionso yina; kimfumu ya ba-Grecs bakaka kimfumu yina. Na manima nani bakaka yawu na ba-Grecs? Ba-Romains. Mpe nani ke twadisaka yinza ya Bantu ya makanda kubanda ntangu yina? Ba-Romain! Ba-Romain, ntangu yayi, yawu yina kisengo.

¹²² Na yina beno tala, Rome ke zinga tii na nsuka, samu yawu kwendaka tii na nsuka ya misapi. Mpe yandi monaka poto-poto, ntoto; mpe ya kele bantu, beto me salama na yawu. Mpe kisengo, ngolo ya Rome, me monana na bayinsi yina nionso. Mpe Rome kele na ngolo na bayinsi nionso kele na nsi ya Zulu.

¹²³ Ya kele na muntu mosi na yinza lendaka sukisa mvita to kubanda mvita, kukondwa . . . na kutubaka ndinga mosi. Ya kele pape. Yinki salama kana yandi me tuba, “Catholique mosi ve kubaka munduki.” Yina ke sukisa diambu, mpangi-bakala, beno tuba yina beno me zola. Kitini ya kulutila nene na yinza, ya Buklisto, kele ba-Catholique. Beno me mona? Mbote mingi. Yandi tuba ndinga mosi, mpe yawu yina.

¹²⁴ Ya ke kaka mutindu ba me tuba awa, “Nani . . .” Beto ke tubila yawu na ntangu ke kwisa. “Nani kele na kiyeka ya kunwana mvita na niama? Nani lenda tuba mutindu yandi? Nani lenda sala yawu? Na yina, beto sala kifwanisu samu na niama.” Ya kele kimvuka ya mabuundu, “kusala kifwanisu mutindu yawu.” Beno me mona? Kuvukisa ba-denomination kintwadi, ba me sala yawu dezia. Oh, beto me kuma na nsuka. Nionso yawu yina, nkundi. Beto kele awa na nsuka. Beno me mona? “Beto sala kifwanisu ya niama,” kima mosi ke fwanana na yawu. Kifwanisu

kele kima yina ke fwanana na kima mosi. Beno me mona? Ntangu yayi beto me kuma na nsuka ya ntangu.

¹²⁵ Ntangu yayi beno tala awa, na nsuka ya nsungi yayi. Ntangu yayi, Daniel, na kapu 2, mpe na nzila ya 34 mpe 35, yandi talaka kifwanisu yayi na bukebi nionso. Mpe yandi talaka yawu tii na ntangu Ditadi zengaka mongo, kukondwa, diboko, mpe Yawu balukaka mpe bulaka kifwanisu na makulu, mpe bukaka yawu. Ntangu yayi, Yawu bulaka yawu na yintu ata fioti ve, ntangu yayi. Yawu bulaka yawu na makulu; yina vwandaka na nsuka ya ntangu, misapi kumi yina.

¹²⁶ Beno me zaba, kieleka awa, kaka na ntwala Tata Eisenhower kubasika, Protestant ya nsuka ya . . . ya Amérique, mutindu—mutindu Ntwadisi ya yinsi, mu ke tula ntembe ti ya ke vwanda diaka ve na yankaka. Kasi—kasi ntangu . . . kaka samu na kutalisa ti, kaka samu na kuvumbula bantu. Ntangu yandi kutanaka, ya vwandaka . . . Lukutakanu ya nsuka yina (bawu) yandi kutanaka na Russie, ya vwandaka na mvwandulu ya bayinsi tanu ya ba-communiste ya Este, bayinsi tanu ya Weste. Tata Khrushchev vwandaka ntwadisi ya bayinsi ya Este. Tata Eisenhower vwandaka ntwadisi ya bayinsi ya Weste. Mpe Khrushchev, na yina mu me bakula mpe yina ba me tuba na munu, ti na ndinga ya Russie, *Khrushchev* zola kutuba “ntoto.” Mpe *Eisenhower* zola kutuba “kisengo,” na Kingelezi. Beno tala kisengo mpe ntoto ya beno, yina ke vukana ve. Mpe yandi katulaka sapatu ya yandi mpe yandi bulaka yawu na zulu ya mesa, mpe nionso yina. Ya ke vukana ve.

¹²⁷ Kasi ya vwandaka bilumbu ya bimfumu yayi ti Ditadi, Ditadi yina katukaka na mongo, kukondwa diboko, mpe bulaka kifwanisu na makulu. Ntangu yayi, “Yawu katukaka na mongo.” Ya lendaka vwanda mongo ya matadi. Yawu katukaka na mongo ya matadi. Ntangu yayi, beno me bakula?

¹²⁸ Ntangu yayi, bampangi balongi, mpe bampangi-babakala mpe bampangi-bakento, na yinza ya muvimba. Na mutindu mu me bakula, Biblia ya ntete yina ba sonikaka, Nzambi sonikaka yawu na zulu, samu bawu fwana tala na zulu mpe kuzaba ti ya ke na Nzambi na Zulu, ti Nzambi kele na zulu ya bawu. Mpe kana beno me bakula na zodiake . . . Ntangu yayi muntu mosi ve na kati ya beno kukwenda . . . Beno kangaka kaka na Biblia yayi awa. Beno me mona? Kasi, zodiake, yawu bandaka ntete na zodiake, na yina mu me bakula, ya kele mwense; ya nsuka na ntalu ya zodiake kele Leo Nkosi. Ya ke Nkwizulu ya ntete ya Klisto, na nzila ya mwense; Nkwizulu ya zole, kele Nkosi ya dikanda ya Juda. Beno me mona? Na yina beto kele na nsungi ya cancer, mpe, diaka, yankaka nionso na kati ya zodiake.

¹²⁹ Ntangu yayi, beto me mona ti ya vwandaka na yankaka yina ba sonikaka, to mosi yankaka yina ba tulaka, mpe yina vwandaka ba-pyramide. Beno me bakula na ba-pyramide, wapi

mutindu yawu bandaka, ya nene na nsi, mutindu mongo, yawu salamaka na matadi ya ngolo, yawu landilaka tii na nsongi? Kasi ya vwandaka ata fioti ve na ditadi yina ba tulaka na nsongi ya pyramide, ya pyramide ya nene kuna na Egypte. Beno baka . . . Kana beno kele na billet ya dollar mosi na pokosi ya beno, beno basisa billet ya dollar mosi mpe beno tala yawu. Mpe beno ke mona na lweka mosi kidimbu ya Amérique, mpe na lweka yankaka ya ke, na nsi, pyramide. Mpe na zulu ya pyramide, ya ke na ditadi ya yintu, kasi ya ke disu mosi ya nene. Mpe ba ke bokila yawu, na nsi ya pyramide yayi, “Kidimbu ya nene.” Samu na yinki ngononi ya Amérique kele ve kidimbu ya nene? Ya kele kidimbu ya Nzambi. Beno ke bambuka moyo, mwa nkunga yina beto vwandaka yimbaka:

Kuna na nzila na kisika ya kieleka ya moyo,
Ya ke na Disu ke tala nge;
Konso kitambi nge ke tula, Disu yayi ya nene
ke landila nge,
Ya ke na Disu ke tala nge.

Ya kieleka. Beno bambuka moyo, beto vwandaka na mwa—na mwa mukembu mosi, beto tuba.

Kana nge yiba mpe nge sala mayuya mpe nge
tuba luvunu kasi na yinzo-Nzambi nge pesa
kimbangi,
Ya ke na Disu ke tala nge.

¹³⁰ Ntangu yayi, kidimbu ya nene. Ntangu yayi, beto zaba, mpe mu ke bakula yawu ve, kitezo ya pyramide. Kasi mu tubaka na beno na malongi ya nsuka, na mwa malongi yina beto vwandaka na yawu, samu beno mona ti yayi nionso ke tambula, kintwadi.

¹³¹ Ntangu yayi, pyramide bandaka, samu na kutalisa Dibuundu, ya nene na nsi. Mpe mutindu ya ke pusana na nsongi, ya ke banda na kukuma mutindu mundongolosi.

¹³² Ntangu yayi, beto ke mona ti, ya ke kuma na zulu na nsongi, mpe ba me manisaka yawu ata fioti ve. Samu na yinki? Samu na yinki? Mu ke kukiyufula samu na yinki! Samu Biblia me tuba ti ba losaka Ditadi ya yintu. Ba losaka yawu.

¹³³ Beno tala ntangu yayi, nsungi ya dibuundu. . . Beno kuwa na bukebi ntangu yayi. Beno kondwa yawu ve. Nsungi ya dibuundu kubanda ntangu ya kusungika, Luther, kuna na bantangu yina ba tulaka matadi ya lufulu, yina kele malongi ya bantumwa. Na manima beto me mona, mutindu bantangu landanaka, kubanda nsungi mosi na yankaka, Dibuundu vwandaka kukuma fioti mingi ntangu nionso. Tii, yawu kumaka na. . . Luther longaka lunungu. Na yina, kuvwanda kaka, kundima kuvwanda Muklisto, bawu vwandaka kufwa beno, bilumbu ya bambangi, bambangi.

¹³⁴ Ntangu yayi beto me mona ti, na bilumbu ya Wesley, beno ke vwanda exalté kana beno me ndima Klisto na ntangu

yina, kuvwanda Methodiste ya malu-malu. Bantu basikaka awa ntangu Wesley kwisaka awa, mpe Asbury, bawu vwandaka na balukutakanu awa na Amérique, mu tangaka masolo ya bawu, ti ba vwandaka sala yawu na balukolo. Na bayinzo-Nzambi ya bawu awa ba vwandaka zola bawu ve. Mpe na nsuka ba kumaka na kisika yina Mpeve-Santu kulumukaka na zulu ya bawu, mpe bawu kubwaka na ntoto, mpe ba vwandaka tiamuna masa na zulu ya bawu, ba vwandaka pupa bawu, bawu banzaka ti bawu ke pema diaka ve. Mpe mu me vwandaka mpe na balukutakanu ya bawu, ntangu mu vwandaka na bamvula makumi tanu. Mpe mu monaka bawu kubwa na nsi ya ngolo ya Mpeve-Santu mutindu yina, mpe bawu vwandaka tiamuna masa na kizizi ya bawu, mpe nionso yina, biboba ya ba-Methodistes ya kimpwanza, bamvula mingi me luta. Ya vwandaka na ntangu ya mpasi kuna.

¹³⁵ Ntangu yayi, na yina, na manima nsungi yina lutaka, nsungi ya Wesley, kwisaka nsungi ya ba-Pentecotiste na mbotika ya Mpeve-Santu. Beno me mona, ya ke soba mutindu ya yawu, konso ntangu. Ditadi yina ya yintu vwandaka ntete ve na zulu ya yawu. Samu na yinki? Bawu me pesa na Dibuundu mutindu ya yawu ya kieleka, to me pesa pyramide mutindu ya yawu samu ti yawu vukana na Ditadi ya yintu, kasi Ditadi ya yintu me kwisaka ata fioti ve. Oh, beno me mona kisika mu kele, mutindu yina ve!

¹³⁶ Ntangu yayi, ministere kubanda Luther tii na nsuka ya Pentecote, na mwa nkonga yina ya bantu fioti awa . . . Yawu yina Nsemo ke mingi diaka ve, na nsungi yayi, na manaka, na schema. Ya ke nsungi ya pentecote, pentecote; ya kele ve—ya kele ve ba-denomination ya ba-Pentecotiste, samu bawu salaka kieleka mutindu Laodicée. Ba kele ba-Laodicéen. Bawu me sala mutindu ba-Nicolaïte, salaka organisation.

Kasi Dibuundu ya kieleka, na yinza ya muvimba, me kuma fioti mingi na mutindu ti ministere mosi ke kwisa na kati ya Yawu, ya kieleka kaka mutindu ministere ya Yesu Klisto. Ntangu yayi yinki ba ke na yawu? Ba me kubama. Ntangu yayi yinki kele kima ya kulanda? Ditadi yayi ba losaka, ya pyramide, yina zengaka mongo kukondwa yinki? Kukondwa maboko. Nzambi fidisaka Yawu. Beno me mona yawu? [Dibuundu me tuba, “Amen.”—Mu.] Yina ba losaka, Ditadi yina ba losaka, kele yintu ya Yayi; ya kele yintu, ditadi ya nsongi. Mpe Yina bawu losaka, na nsungi ya Bantu ya makanda, kele Klisto. Mpe ba katulaka Klisto mpe ba tulaka vicair, to mwana ya Nzambi, to bantu ya lukumu na kati ya dibuundu. Yandi kele Mpeve-Santu. Mpe nsongi ya pyramide ke vwanda Klisto yina ke kwiza. Beno me bakula yawu? [“Amen.”]

¹³⁷ Ntangu yayi, samu ti ba me kuma na mutindu yina ba lendaka vwanda, (Beno me mona ti mu me sala yawu awa mutindu pyramide, basantu yina ke na kutelama?) ba ke na kukota na Nkembo. Beno me bakula yawu ntangu yayi?

[Dibuundu me tuba, “Amen.”—Mu.] Klisto, Ditadi ya yintu, Ditadi yina ba losaka, Disu yina ke monaka nionso, yina ke kwisa ya kieleka mutindu Biblia zabisaka yawu. Mpe Daniel tubaka ti yandi talaka nsungi yayi ya Bantu ya makanda tii kuna Ditadi yina katukaka na mongo, yina ba zengaka ve na maboko. Ba me tulaka ata fioti ve ditadi ya nsongi na zulu ya pyramide yina. Ba zengaka Yawu ve na maboko ya bantu. Ya ke diboko ya Nzambi yina zengaka Ditadi yango. Beno me mona yawu? [“Amen.”] Mpe yinki Yawu salaka? Yawu bulaka kifwanisu kaka na makulu, mpe bukaka yawu bitini-bitini, yawu kumaka putulu. Alleluia! Yinki salamaka na ntangu yina, na nkwezulu ya Ditadi yina? Ya ke na ntangu yina Dibuundu mataka na Nkembo, na Enlevement, samu yawu sukisaka nsungi ya Bantu ya makanda. Nzambi sukisaka yawu; nkwezulu ya Ditadi yina.

¹³⁸ Ya vwandaka na bantu yina kwisaka awa na yinzo-Nzambi, mwa bakala mosi ya fioti na kento ya yandi. Ba vwandaka baka Biblia mpe ba vwandaka tulula Yawu kisika mosi kuna; mpe ba vwandaka landila, na kuyimbaka:

Oh, mu ke sosa Ditadi yina vwandaka baluka
na Babylone,

Yina vwandaka baluka na Babylone... (Ba
vwandaka tambula, na kusosaka Yawu, beno
me mona.)

Mu ke sosa Ditadi yina kotaka na Babylone na
kubalukaka.

¹³⁹ Yandi yina! Klisto kele Ditadi yina. Yandi bukaka na muntu ve. Yandi butukaka na Nzambi. Yandi ke kwisa samu na Dibuundu yina me butuka mbala ya zole, na nzila ya Mpeve ya Nzambi, samu ngolo ya Ditadi yina ya yintu ke luta na Dibuundu ya muvimba, mutindu aimant.

¹⁴⁰ Mu ke bambuka moyo na ntangu mu vwandaka awa na zulu, mu vwandaka tala yinzo yina ya bisengo na ntangu yina, kisika ba vwandaka yidika bima ya mutindu na mutindu. Mpe ya vwandaka na mvindu nionso ya bima yina ba vwandaka yidika na ntoto, ba kombolaka nionso yina. Ditadi mosi ya nene kwisaka kanga yawu, ditadi yina ya nene ya aimant, mpe yawu lokotaka yawu samu ya vwandaka bendama na yawu.

Beto fwana bendama na Ditadi yina ya yintu. Ditadi yina ya yintu kele Mpeve-Santu, Klisto. Mpe beto nionso kele na kubendama yina ya Mpeve-Santu. Ntangu Ditadi yina bulaka kifwanisu, Dibuundu ke kwenda bumbama na Yawu, Yandi ke vutuka na Nkembo. Ba ke zangula Yandi, na Enlevement ya basantu, ntangu Yandi ke kwenda kilumbu yina.

¹⁴¹ Ntangu yayi, beno tala mbote awa. Beto me mona ti, ntangu yayi ba-Juif ke na kuvutuka, bamvula makumi yiya me luta, kaka ntangu yina mosi bawu salaka na kukwenda tii na kubeba

ya tempelo. Ya lombaka bawu pene ya bamvula makumi yiya na kuvutuka, na ntwala ya kutunga tempelo yankaka. Beno me mona, beto me kuma na nsuka ya nzila. Mbote, kana Bantu ya makanda . . .

¹⁴² Ntangu yayi beto baka . . . Beto me mona Dibuundu, nkwezulu ya Ditadi. Beto baka nsungi ya nsuka. Beto me longuka yawu. Beto me mona ntangu yayi. Mu ke kwikila ti mu ke na kima mosi mu me sonika awa. Beto tala, fioti. “Mpe ntinu yina ke kwisa, yina kele mbeni ya Klisto, ke sala ngwisani na ba-Juif.” Mpe na Daniel 7 . . . to—to 9:27. “Mpe na kati-kati ya sabala, bamvula tatu na ndambu, niama ke sala ngwisani ya yandi . . .” Mu—mu zola kuma na yawu, na mwa ntangu fioti na ntwala, ngwisani yina. Beto zola bika . . . Mu zola banda kaka awa ntangu yayi.

¹⁴³ Mosi na mosi ya bansungi yayi ya Bantu ya makanda me siamisama na mutindu ya kukondwa kubwa na munati nsangu ya bawu, na nzila ya nsangu, mpe yina ke salama.

Nsungi yayi *awa* vwandaka nsungi ya nkembo.

Nsungi yina me landa, ba me tuba ti ya ke vwanda na malongi yina ba ke bokila, to kima mosi ke kwisa yina ba ke bokila, “banzonzolo ya ba-Nicolaïte.”

Na manima ya ke kwisa, kima ya kulanda, ya me kuma malongi.

Na manima ya ke kwisa, makwela ya . . . samu na dibuundu ya ba-Nicolaïte, mpe basantu yina monaka mpasi. Mambu nionso salamaka kaka mutindu yina.

Beto me kuma na yina ya kulanda, mwa Nsemo fioti me banda. “Nge ke na mwa ngolo fioti, mpe nge ke na nkumbu ya kuzinga, kasi nge ke ya kufwa. Kindisa yina nge me kuzwa ntete, kana ve Mu ke kwisa, kukatula mwinda.”

¹⁴⁴ Na manima tala Wesley me kwisa, na manima ya yina, na nsungi yayi. Beto me mona kieleka yina . . . nsungi ya Wesley, yinki ba me bokila yawu? Philadelphie. Nsungi—nsungi ya kulutula nene ya zola yina beto me kuzwaka ntete ve, nsungi ya Philadelphie, vwandaka na ntangu ya John Wesley.

Ntangu yandi kwendaka, Pentecote kwisaka, mpe ya vwandaka tiya ve mpe madidi ve.

Na manima beto ke vutuka samu na kumona wapi mutindu ya Nsangu lendaka kwisa na ba-Pentecotiste, na nsuka.

Beno bambuka moyo, bawu nionso kwisaka na nsuka ya nsungi. Santu Paul kwisaka na nsuka. Bayankaka nionso kwisaka na nsuka, Santu Irénée na bayankaka nionso. Nsungi ya yina vwandaka landila tii na yina yankaka, ya vwandaka fwanana na yina yankaka, mpe yandi vwandaka vutukila yawu mpe vwandaka landila na yawu na nsungi yina yankaka. Beno me mona?

¹⁴⁵ Ntangu yayi, beto ke mona ti, na nsungi yayi, ya ke na mbwetete mosi, mutindu beto ke na yawu kuna. Beto ke na mbwetete, munati nsangu. Beto ke na muntu mosi, Nsangu yina ba ke longi na nsungi yango; bantu yina ke losi Yawu; bantu yina ke ndima Yawu. Mpe munati nsangu ya nsungi yayi fwana kwisa na ngolo ya Elie. Ya kieleka. Mpe yandi fwana “Vutula Lukwikilu ya bana na batata, kuvutula ndambu ya ba-Pentecotiste yina me bikala, na Lukwikilu ya kieleka ya bantumwa.”

¹⁴⁶ Ntangu yayi, Lukwikilu ya kieleka ya bantumwa, kana beno ke tanga Yawu na Buku ya ba-Actes, beno ke mona ti ya me vwanaka ata fioti ve na muntu yina me bakaka mbotika, “na nkumbu ya ‘Tata, Mwana, Mpeve-Santu.’” Ya me vwanaka ata fioti ve na mosi na kati ya bawu yina ba me losilaka masa. Ya me vwanaka ntete ve na bima ya mutindu yayi yina beto ke na yawu bubu yayi, yina ba ke bokila Pentecote, yina me salamaka ve na ntangu yina. Ba vwanaka na bakumonisama ya kieleka, mpe Mpeve ya Nzambi na kati ya bawu, yina vwanaka kukondwa kubwa Mwana ya Nzambi yina vwanaka sala na kati ya bawu.

Muntu yayi yina zolaka kwisa, Nsangu yayi, mu zola tuba, yina zolaka kwisa, fwana vwanaka mutindu Elie. Elie fwana kwisa mbala tatu.

Ntangu yayi beno ke tuba, ti, “Jean Baptiste vwanaka bakala yina.” Kana beno tala mbote, Yesu tubaka ti Jean Baptiste vwanaka munati nsangu ya Malachie 3, Malachie 4 ve. “Beni tala, Mu ke tinda beno munati nsangu ya Muni na ntwala ya kizizi ya Muni.” Mu banza Matthieu 11:6, kuna na kati beno ke mona yawu, Matthieu kapu 11.

¹⁴⁷ Ntangu yayi, kasi na bilumbu yayi ya nsuka, Mpeve ya Elie ke kwisa na kati-kati ya bantu, mpe yandi ke sala kima mosi yina ba salaka na ntangu yina. Nkadulu ya yandi ke vwanaka mutindu mosi, nkadulu ya Dibuundu. Nkadulu ya muntu yina ke vwanaka kaka mutindu mosi. Mpe Nsangu yayi ba ke longi, na kumekaka. . . Ba ke yina yandi, na bantu. Yandi ke yina bakento, bayina kele ya nsoki, kaka, bayina kele ya yimbi. Yandi ke zola bamfinda; yandi ke vwanaka muntu ya nganzi, na kidi-kidi ntangu nionso, mutindu Elie vwanaka, mpe mutindu Jean vwanaka. Mpe beto me mona bima yayi nionso me salama. Kana beto me kuzwa Nsangu, beto me mona ti ba me losi Klisto. Beni fwana vwanaka mosi ya ba-organisation yayi to beno lenda kota na yawu ve. Na yina, Yandi, ba me losi Yandi na nganda. Beni me mona? Klisto lenda sala na kati ya bawu ve.

“Nani beno kele?”

“Muklisto.”

“Wapi denomination beno kele?”

“Mu kele ya ata na mosi ve.”

“Beto ke na mfunu ya beno ve.”

¹⁴⁸ Beno me mona, ba me losa Yandi. Ya kieleka! Beno me mona, ba me losa! Na yawu ba losaka Elie, mpe ba losaka mpe Jean. Kasi, yinki, ya vwandaka yangisa bawu? Ya vwandaka yangisa nsangu ya bawu? Bawu tubaka, “Oh, beno bantu ya yintu-ngolo.” Bawu tubaka yawu pwelele. Bawu tafunaka yinwa ya bawu ve. Bawu landilaka na kukwenda na ntwala. Mpe Nsangu ya Nzambi ke kwenda kaka na ntwala, kukondwa kutala yina muntu mosi ke tuba, beno me mona, tii na kubeba, mpe ntangu. . . yina ba tubaka kutiamuka. Mpe beto kele na nsuka.

¹⁴⁹ Ntangu yayi, beto me kuma ntangu yayi, na bamvula makumi yiya ya kuvutuka, kubanda Mvita ya Ntete ya Yinza ya Muvimba, mpe kubanda ba-Juif me vutuka na yinsi ya bawu. Nzambi me salaka ata fioti ve na Israel kana yandi kele ve na yinsi ya yandi.

¹⁵⁰ Ntangu yayi, beno bambuka moyo na ntangu ba-juif vwandaka vutuka, ba-Juif yina katukaka na bayinsi yankaka, mpe magazine *Look* me pesa zulunale ya yawu. Mu tangaka kitini ya zulunale mosi, magazine mosi ya basambidi, yina vwandaka tuba ti bawu. . . Ba-avion kulumukaka kuna samu na kubaka ba-Juif yina vwandaka ntama kuna na Iran. Mpe mu zaba kisika ba vwandaka, bawu vwandaka ya kupanzana.

Ntangu yayi, bayina kele ba-Juif ya kieleka, bayina kuzwaka ata fioti ntangu ya mbote. Ntangu yayi, mpangi-bakala, tala nkama na makumi yiya na yiya ya mafunda ya beno. Kana beto tanga na Apocalypse 11, beno ke mona bawu. Yandi tubaka, “Ya ke na makanda kumi na zole (ya Gad), makanda kumi na zole (ya Aser), makanda kumi na zole (ya Ruben), makanda kumi na zole. . .” Mpe wapi sika bawu nionso vwandaka? Na zulu ya Mongo Sinai. Ba-Juif, kuna na yinsi ya bawu, bawu vwandaka kuna. Ya vwandaka bawu kasi ya vwandaka ve nkonga ya bayibi yina ya Wall Street. Ve, tata. Ya vwandaka ba-Juif ya kieleka.

¹⁵¹ Mpe ntangu kiboba ya rabbin yayi telemaka kuna mpe monaka avion yayi ke kubwa na ntoto, ba-Juif yayi. Beto tangaka yawu na magazine. Ba vwandaka bundula kaka na bapusu ya mabaya. Mpe ntangu bawu monaka kima yina kukulumuka kuna, bawu kwendaka pene-pene ya yawu ve. Kiboba ya rabbin yayi telemaka kuna mpe yandi tubaka, “Beno bambuka moyo, profete ya beto tubaka, ‘Ntangu beto ke vutuka na yinsi ya beto, beto ke mata na zulu ya mapapu ya ngononi.’”

Bayinsi ke na kukabwana, Israel ke na kuvumbuka,

Bidimbu yina baprofete zabisaka na ntwala.

Beto ke kuma ntama ve na sabala ya sambwadi ya bawu.

¹⁵² Mu ke banza, munu mosi, mu vwandaka kuna, ntangu Mpangi Pethrus tindaka bawu mwa Bangwisani ya malu-malu, mpe bawu tangaka yawu. Bawu tubaka, “Mbote, kana yayi

kele Mesiya, bika beto—bika beto mona Yandi sala kidimbu ya Profete; kana Yandi kele ya kufwa ve, Yandi kele ya moyo.” Bawu tubaka, “Yandi vumbukaka diaka na lufwa; Yandi ke zinga na kati ya Dibuundu ya Yandi; bika beto mona Yandi kusala kidimbu ya Profete, mpe beto ke kwikila na Yandi.” Ba-Juif ke kwikilaka ntangu nionso. . . Bawu me zaba ti Mesiya fwana vwanda Profete.

¹⁵³ Mpe ntangu mu telemaka kuna na sika ya Mpangi Arganbright kilumbu yina, kisika yina kuna, mpe ba-Juif yina vwandaka kuna, bawu tubaka, “Kwisa na sika ya beto, na bantu ya beto.”

¹⁵⁴ Mu tubaka, “Ya kieleka, mu ke sepela na kwisa.” Mu bakaka kaka lukanu, na nswalu nionso.

¹⁵⁵ Mu kwendaka na Caire, na Egypte. Na nkokila yina, ntangu mu monaka avion yina ke kubwa kuna na Caire, yawu bambukaka munu moyo. Na yawu ntangu beto kumaka kuna, mpe mu vwandaka na billet ya munu samu na kukwenda na Israel, ba zolaka kutana na munu kuna. Mu tubaka, “Kwenda, vukisa mwa mafunda ya bantwadisi. Nata bawu kisika mosi kuna na ndimba, beto ke tala kana Yandi kele kaka Profete to ve. Amen. Mbote, beto tala yina Yandi ke sala.” Oh, ya vwandaka kaka pene-pene ya bawu. Yawu yina bawu zolaka. Kana ba lendaka mona yawu, bawu zolaka kwikila yawu.

¹⁵⁶ Na yawu yinki mu salaka? Mu kumaka na Caire, mpe mu bandaka na kumata kuna. Mu vwandaka na billet ya munu; pene ya minuti makumi zole bikalaka samu ba bokila. Kima mosi tubaka, “Ntangu yayi ve. Mbungu ya masumu ya nkú, ya Bantu ya makanda, me fuluka ntete ve. Ba-Amoréen me fuluka ntete ve. Vwanda na nganda ya yawu!” Mu banzaka ntangu yankaka ti ya vwandaka dibanza ya munu, mpe mu kwendaka na manima ya hangar mpe mu sambilaka. Ya tubaka, “Vwanda na nganda ya yawu ntangu yayi.” Na yina mu bakaka billet ya munu mpe mu kwendaka kisika yankaka. Mu kwendaka ve, samu ngunga me lunga ntete ve.

¹⁵⁷ Ntangu yayi, wapi ntangu yina Nzambi ke pesa muswa na ba-Juif yina, kubanda na kusala na bawu diaka, mu lenda tuba na beno ve. Mu me zaba ve. Muntu mosi ve me zaba. Kasi, beno kuwa, kana Israël kele dezia na yinsi ya bawu, nionso me kubama. Ba me lokuta matadi nionso, mpe kanale, bamasa, mpe nionso yina Nzambi silaka. Bawu kuzwaka mabulu ya masa na bima yankaka kuna, mpe banzadi ya nene ke kulumuka kukondwa mpasi, yina ke kisika ya kitoko mingi beno me monaka ntete ve. Ba ke na mbanza yina ba me tunga kuna. Ba ke na kanale. Ba ke na yinsi ya kulutula kitoko yina kele na yinza, kuna. Mpe beto me mona, kuna na Nzadi Mungwa, ya ke na ba-produit chimique, mingi, samu na kusumba yinza ya muvimba. Beno me mona?

158 Bima nionso me kubwa na maboko ya bawu. Wapi mutindu ba me sala? Samu ntima ya Hitler kumaka ngolo, ntima ya Mussolini kumaka ngolo, kaka mutindu ntima ya Pharaon kumaka ngolo, mpe ba tindaka bawu na ngolo na kuvutuka na yinsi yina. Mpe na yina bamvula makumi yiya ba ke na kuvutuka na yinsi yina. Ntangu yayi ba kele kuna, ba ke na kuingila.

159 Dibuundu ya Bantu ya makanda kele na Laodicée, nsuka ya Nsungi ya Laodicée. Kana . . . Ba-Juif kele na yinsi ya bawu, dezia kuna. Mpe kumanga ya lukwikilu ya Bantu ya makanda me salama dezia. Mpe na Ntwadisi ya yinsi mutindu yina beto ke na yandi. Na yinsi ya kukabwana mutindu yina beto ke na yawu. Beto ke na ba-bombe atomique na ba-hangar. Beto ke na dibuundu yina kele tiya ve mpe madidi ve. Beto ke na Dibuundu, nkonga ya bantu, yina me vukana kintwadi. Beto ke na ministere yina me fwanana na ministere ya Yesu Klisto, samu na kusimba Ditadi ntangu Yawu ke kwisa. Yinki me bikala na kusalama? Ya lendaka vwanda na konso ntangu. Kima diaka ve me bikala. Beto me kuma na ntangu ya nsuka. Oh, nkembo! Mu me zaba ve kana mu ke vwanda na kiyeka ya kukuma na mukembo yina, to ve, kasi mu ke zola—zola kubaka kitini ya yawu samu na beno, na mutindu nionso.

160 Beno kuwa, keti . . .? Bantu yikwa lenda mona ntangu yayi? Beno me mona kisika Masonuku me siamisa ti basabala makumi sambwadi vwandaka bamvula makumi yiya na yivwa? [Dibuundu me tuba, “Amen.”—Mu.] Beno me mona kisika basabala makumi sambanu na zole vwandaka bamvula bankama yiya na makumi tatu na yiya? Beno me mona kisika basabala makumi sambanu na yivwa na ntangu yina vwandaka—vwandaka—vwandaka . . .? Yinki ya vwandaka? Bankama nana na . . . Bamvula bankama yiya na—na makumi nana na tatu. Bamvula bankama yiya na makumi nana na tatu tii na ntangu yayi. Beno me mona kisika ba katulaka Ntinu? Beno me mona, beno fwana baka bamvula makumi yiya samu ti ba-Juif kumanisa na kukuma kisika yina, Nzambi tubaka ti ba ke vwanda.

161 Beno tala awa kisika nsungi ya Bantu ya makanda me luta samu na yina nionso beto zabisaka samu na yawu; kisika, *beto* ve zabisaka samu na yawu; kasi yina Biblia zabisaka samu na yawu. Yina Biblia zabisaka samu na yawu, me salama tii na nsungi yayi ya nsuka; mpe na yina bamvula makumi yiya ba-Juif yayi ke na kuvutuka awa, ba ke na kukubama samu Nzambi kusala kieleka yina Yandi tubaka awa. Bawu basikaka mutindu yayi, mpe ba me vutuka mutindu yayi. Mpe Israël me vutuka na yinsi ya yandi.

162 Ntangu yayi, wapi ntangu Nzambi ke banda sabala ya bawu ya nsuka? Wapi ntangu? Ya lendaka vwanda bubu yayi. Ya lendaka vwanda na ntuala mwini kulala na nkokila yayi. Nzambi ke samuna yawu. Wapi ntangu ya kele, mu me zaba ve. Mu ke na kukiyufula. Kasi mu ke zabisa kima mosi awa,

ntangu yayi, na mwa ntangu fioti, mpe mu me zaba ve kana beno ke kwikila yawu to ve. Kasi mu—mu—mu fwana tuba yawu, na mutindu nionso, mu ke kwikila.

¹⁶³ Beto kele na yinsi ya beto. Ba-Juif kele na yinsi ya bawu. Beto me kuma na nsuka ya nsungi, ya kukubama samu na Enlevement. Enlevement ke salama, Dibuundu ke mata, beto me zangukasamu na kukutana na Yandi na mipepe. Beto nionso me zaba yawu. Ditadi yina ba zengaka na mongo, me kubama samu na kukwisa na konso ntangu yina. Mpe ntangu Yawu ke kwisa, yinki Yawu ke sala? Yawu ke sukisa nsungi ya Bantu ya makanda. Ya ke vwanda nsuka, mpe Nzambi ke sukisa ya muvumba na kusala na bawu. “Bika ti yina kele mvindu yandi kukuma diaka mvindu; bika ti yandi yina kele ya santu yandi kuvwanda diaka ya santu.” Beno me mona? Yinki Yandi ke sala na ntangu yina? Yandi ke baka Dibuundu ya Yandi, bayina kele ya kufuluka na Mpeve-Santu.

¹⁶⁴ Yinki kele “mvindu”? Ya kele mwense yina kele ya kulala mpe bayina ke luta na lusambusu, ntama *awa*. Beto ke tula yawu na schema yankaka, ntangu beto ke landila yayi kuna, kisika yandi ke kwisa na Lusambusu ya Kiti ya kimfumu ya Mpembe mpe ba ke sambisa yandi na bantu yina ba me kukuula. Paul tubaka na beto na kukwenda ve na tribunal samu na kuyidika diambu mosi, samu basantu ke sambisa ntoto. Ya kieleka. Beto me kuma na ntangu ya nsuka, *awa*, ntangu yayi. Mbote mingi.

¹⁶⁵ Mpe na kati-kati ya sabala yayi. . . Ntangu yayi, ya ke na makumi sambwadi. Ntangu yayi, kana ya kieleka yayi vwandaka bamvula sambwadi, basabala mosi na mosi, mpe beto me kuzwa dezia basabala makumi sambanu na yivwa; na yina beto kele na nsungi ya Bantu ya makanda, mpe beto zaba ti beto kele na nsuka ya nsungi ya Bantu ya makanda; na manima ya kele diaka na sabala mosi me bikala samu na ba-Juif. Ya kieleka? Mpe yina kele kieleka bamvula sambwadi. Kana *yayi* vwandaka bamvula sambwadi, *yina* kele bamvula sambwadi, samu Yandi tubaka, “Ya kele na basabala makumi sambwadi yina ba me zenga samu na bantu ya nge.” Na yawu beto ke na bamvula sambwadi samu na ba-Juif. Ya kieleka? Beno tala yawu ntangu yayi. Kana ya ke na kiuvu, mu zola zaba yawu. Beno me mona?

¹⁶⁶ Ntangu yayi, mpe na kati-kati ya sabala, kati-kati ya sabala yayi ya ba-Juif; beno me mona, ya ke na bamvula—bamvula tatu na ndambu; mbeni ya Klisto, ntinu, ntinu yina ke kwisa. Mpe beno bambuka moyo, yandi ke katuka na Rome, ntinu yina ke kwisa. Nani yandi kele? Pape. Ntinu na kati ya bantu, yina ke kwisa, Pharaon mosi ke kwisa yina me zaba Joseph ve.

¹⁶⁷ Ntangu yayi, beno ba-Protestant ke tuba, “Mbote, ntangu yayi, yawu yina.” Kasi beno vingila fioti. Beto me mona ti ba-Protestant ke na kusala organisation, ba ke na kusala kimvuka ya mabuundu, kifwanisu ya niama, mpe ba ke tambula na bawu.

168 Mpe beto ke mona awa ti ba me bokila ba-Juif na kimvuka yayi ya mabuundu, (yinga, tata), mpe ba me ndima. Mpe Biblia me tuba ti bawu me ndima yawu. Mpe yandi ke sala ngwisani na bawu.

Na kati-kati ya sabala ya makumi sambwadi, yandi ke zenga yawu, mbeni ya Klisto ke zenga ngwisani ya yandi na ba-Juif, “bantu ya nge.” Samu na yinki?

Mpe beto me tanga na Apocalypse 11, ti, “Mu ke fidisa . . .” Ya kele 11. Beto me kuma pene-pene ya 19 ntangu yayi. Ti Yandi ke fidisa baprofete ya Yandi zole, mpe ba ke pesa profesi na ntangu yina, na manima ba ke dasukila baprofete yayi mpe ya kieleka ba ke kufwa bawu. Ya kieleka? Mpe ba ke tula bamvumbi ya bawu na bala-bala ya kimpeve yina ba bokilaka Sodome na Gomorrhe, kisika ba komaka Mfumu ya beto na kulunsi, Jérusalem. Ya kieleka? Mpe ba tulaka bawu kuna bilumbu tatu na bampimpa tatu. Mpe na manima ya bilumbu tatu mpe bampimpa tatu, mpeve ya luzingu ke kwisa kota na kati ya bawu, mpe ba ke vumbuka na lufwa mpe ba ke kwenda na Nkembo. Ndambu mosi ya bandambu kumi ya mbanza mwanganaka na ntangu yina. Ya kieleka? Beno me mona? Yinki yina? Na kati-kati ya bamvula makumi sambwadi yayi ya nsuka.

169 Ntangu Dibuundu me kwenda; na manima kimvuka ya mabuundu, mwense ya kulala, ba-Methodiste, ba-Baptiste, ba-Presbytérien, mpe ba-Pentecotiste tiya ve mpe madidi ve, bawu nionso kintwadi na kimvuka ya mabuundu. Na yina, ba ke ntete na mutindu ya bawu ya kuyala ntangu yayi. Mpe ntangu ba ke sala yawu, ba ke sala ngwisani. Mpe, mbote, ntangu yayi, pape yayi ya malu-malu yina beto ke na yandi ntangu yayi zola kukotisa bawu kuna. Beno lenda mona ve mutindu diambu yango ke kuma ya kieleka? Yandi ke sala nzonzolo samu na yawu, mpe yandi ke kotisa bawu nionso na kati, samu na mbala ya ntete kubanda bamvula bankama na bankama na bankama; bamvula funda mosi, to zole, ya me salamaka ve. Kasi ntangu yayi yandi ke kotisa bawu nionso, kintwadi, mpe yandi ke sala kimvuka ya mabuundu, mpe ba-Juif ke ndima kukota na yawu. Oh, la la! Nkembo! Alleluia! Lukumu kuvwanda na Nzambi ya beto Yina ke zinga kukondwa nsuka mpe mvula na mvula! Yawu yina! Ntangu yayi, mpangi-bakala, ya ke mpasi ve, kukondwa mpasi na mutindu ti mwana ya fioti lendaka mona yawu. Kimvuka ya mabuundu ke vukisa ba-Juif, na ba-Protestant, na ba-Catholique, kintwadi.

Mpe beno bambuka moyo, yinki baprofete yayi zole ke sala ntangu bawu ke kwisa?

170 Niama yayi, ntinu yayi ke panza ngolo ya bantu ya santu, yinki yandi ke sala? Yandi ke buka ngwisani ya yandi na bawu. Na manima ya bamvula tatu na ndambu, yandi ke katula bawu. Ntangu yayi, bantu ke banza ti ya kele communisme. Ya kele

kaka samu beno. . .Mpeve ya Nzambi me sala na beno ntete ve. Ya kele communisme ve; ya kele nsambulu. Biblia me tuba, “Ya ke vwanda pene-pene mingi ti ya lendaka vuna yina ba me Soolaka kana ya lendaka salama.” Yesu tubaka mutindu yina. Beno me mona, beto me kuma na nsuka.

¹⁷¹ Ntangu yayi, baprofete yayi zole, yinki bawu ke sala? Ya kele Moise na Elie yina ke kota na kosalu. Ba ke tuba na ba-Juif yina kifu ya bawu. Mpe na kati ya nkonga ya ba-Juif yina kele kuna ntangu yayi, ya ke vwanda na nkama na makumi ya yiya na yiya ya mafunda, Nzambi ke bokila na nzila ya baprofete yayi. Yinki ya kele? Mpeve ya Elie, yina vwandaka na Dibuundu yayi ya Bantu ya makanda, ke landila kaka tii na dibuundu ya ba-Juif, ya ke kwenda kuna mpe ke bokila; Moise na yandi. Alleluia! Beno me mona yawu? Mpe yandi ke longa Nsangu yayi mosi ya pentecote, na ba-Juif yina, ti bawu losaka Mesiya. Amen! Beno me mona yawu? Ya ke vwanda Nsangu mosi yina ya Pentecote, yina ba-Juif yayi ke longa bawu kuna. Mpe ba ke yina mingi ba-Juif tii kuna ba ke kufwa bawu. Mpe ba yinaka bawu na bayinsi nionso.

Mpe na kati-kati ya sabala, samu ti nkonga ya nene ya ngolo ya nkama na makumi yiya na yiya ya mafunda, basikaka. Bawu vwandaka na Mpeve-Santu. Mpe, mpangi-bakala, beno ke zonzila bimangu, bawu salaka yawu. Bawu kangaka mazulu, mpe mvula nokaka ve na bilumbu ya profesi ya bawu; ba bulaka ntoto na bampasi, na konso ntangu yina ba vwandaka kuzola. Bawu tindaka bampasi mpe nionso yina. Ba ke pesa mpasi na ba-Romain yayi. Kasi, na nsuka, ba ke kufwa bawu. Nzambi ya beto kele Nzambi ya ntitisa ntangu Yandi kele na nganzi. Kasi beno bambuka moyo, ya kele kuna na sabala ya makumi sambwadi, mpe Dibuundu kele na Nkembo, amen, na ntangu ya Madia ya Makwela. Yinga!

¹⁷² Beno tala ntangu yayi. Ya ke kisika yina beto mona kuvutuka ya Yandi na Tempelo ya Millenium kuna na nsuka ya nsungi ya ba-Juif, “mupakulami.” Yandi yina ke kwisa, na zulu ya mpunda ya mpembe; bayina vwandaka kulanda Yandi, vwandaka na zulu ya bampunda ya mpembe. *Mpunda*, “bangolo.” Ba vwandaka me lwata bilele ya mpembe; menga, to, kinkuti ya kupola na menga; yina ba me sonika na zulu ya Yandi, “Ndinga ya Nzambi.” Yandi me kwisa mutindu Munungi ya ngolo, yinga tata, samu na kusala Millenium, Yandi kotaka na tempelo. Nkembo! Ya ke kuna Yandi ke kutana na nkama na makumi yiya na yiya ya mafunda yina, ntangu yayi, na manima ya sabala ya makumi sambwadi yayi awa.

¹⁷³ Sabala ya makumi sambwadi, yayi ke salama na sabala ya makumi sambwadi. Na kati ya yawu, na kati-kati ya yawu, yandi ke buka yawu, samu yandi ke kufwa baprofete yina zole ya bapentecotiste, yinga tata, yina ke bula ntoto.

Mpe, tala, Yandi ke singa dibuundu yina, mpe Yandi ke yoka yawu na tiya. Mpe, na yina, yandi . . . Beto ke mona ti kuna, ata mpe ba-marin vwandaka ntama, bawu tubaka, “Kiadi, kiadi mbanza ya nene ya kukondwa kufwa ya Rome, yandi me kufwa kimakulu na ngunga mosi.” Yandi me pasuka bitini-bitini. Nzambi me zaba wapi mutindu kusala mambu. Mpe Wanzio mosi talaka, mpe tubaka, “Tala, menga ya bambangi nionso ya Klisto me monana na yandi,” samu na luvunu ya yandi, yandi kwendaka kuna mpe salaka organisation, mpe salaka mambu yayi yankaka, mpe tulaka mvindu na dibuundu, mpe kotisaka mambu yayi kuna, mpe kufwa bambangi yina vwandaka meka na kusimbisa Yawu mpe vwandaka meka na kubasisa yawu.

¹⁷⁴ Nkembo! Oh, mu—mu me zaba ve. Mu—mu—mu ke na nsatu ya kukwenda na ntwala. Beno me mona? Beno ke na kiese ve na kuvwanda na Nsemo ya Mwana, na kutambula na kati ya Nsemo ya Mwana! Wapi kisika beto kele, mpangi-bakala? Na ngunga ya nsuka! Ya fwana salama, konso ntangu yina. Beto me kuma kisika yango!

¹⁷⁵ Nsangu me kwenda tii na dibuundu ya ntangu ya nsuka, dibuundu yina losaka Klisto ya yandi. Ba-Juif kele na yinsi ya bawu kubanda ntangu yayi, ya bamvula makumi yiya. Mbanza ya malu-malu me tungama. Yinki ba ke na kuingila? Nkwizulu ya Mesiya. Wapi ntangu ya ke vwanda? Mu me zaba ve. Ntangu Ditadi yina ke bula kifwanusu *awa*, Yandi me kwenda; ya ke suka na ntangu yina.

¹⁷⁶ Ntangu yayi beto tala awa. Na kati-kati ya sabala, bilumbu tatu na ndambu . . . bamvula tatu na ndambu, mu zola tuba, yandi ke buka ngwisani mpe ke sukisa munkayulu na dikabu . . . yina ba ke vwanda me vutula ntete.

Samu, ba ke vutuka kuna mpe ba ke tuba, “Ntangu yayi, beno tala, beno nionso kele mabuundu. Beno fwana ndimama na kifwanusu yayi ya niama. Beto ke vukana. Beto ke yambula communisme. Beto ke kombola ya muvimba communisme.” Beno me mona? Mpe bawu lenda sala yawu. Beno me mona? Mpe ba ke sala yawu.

¹⁷⁷ Kasi beno tala ntangu yayi. Mpe kuvutula, mpe kuvutula yayi, kusambila kilumbu mpe munkayulu ya konso ke vutuka na mbanza ntangu ba ke tunga diaka tempelo. Mpe ntinu yayi ke kwisa na kati-kati ya sabala yayi, ke buka ngwisani ya yandi mpe yandi ke sukisa munkayulu. Yandi tubaka, “Yandi ke panza, ke panza yawu.” Mpe yina yandi ke sala, mpe ya ke vwanda tii na nsuka.

¹⁷⁸ Mpe beno tala:

. . . *kumwangana ya busafu samu na kupesa kiadi* . . .

“Kumwangana ya busafu.” Yinki kele *busafu*? “Mvindu.” Beno me mona? “Samu na kupesa kiadi,” yinki yina? “Kukatula.” Kumwangana ya *yayi*, samu na kukatula *yayi*. Beno me mona?

Kumwangana ya ngolo yina ya Rome, samu na kuyala bamwense nionso ya kulala, ba-Juif mpe nionso. “Beto nionso ke vwanda ba-Romain to beto ke vwanda kima mosi ve.” Yandi ke buka ngwisani ya yandi na kati-kati ya sabala.

¹⁷⁹ “Kumwangana ya busafu.” Kana ya vwandaka busafu na ntangu ya Yesu, ntangu Rome kwisaka kuna na propagande ya yandi; ya ke vwanda diaka Rome, yina ke vwanda diaka busafu samu na dibuundu.

...samu na kupesa *kiadi*, mpe ke landila tii *kubeba*...

Yinki yandi ke sala? Yandi ke landila yawu tii na kubeba, ya kele, nsuka.

¹⁸⁰ Ntangu yayi, ba-Juif, na ba-Romain, ba-Protestant (yina kele, mwense ya kulala), ba ke vukana kintwadi na mutindu ya kimvuka ya mabuundu. Mpe ya ke vwanda mutindu Yesu tubaka na Matthieu 24, mpe na Apocalypse 13:14.

Beto baka Apocalypse 13:14, samu na kutala yawu. Mu me sonika yawu awa, samu na kumona yawu, 13:14. Mbote mingi, tata.

Mpe yandi vwandaka vuna bantu na bimangu yina yandi vwandaka sala na (kuvukisaka mabuundu yayi) na ntuala...na kutubaka...na ntuala ya niama; na kundimisaka bantu nionso na zulu ya ntoto, na kuyidika kifwanusu samu na kuzitisa niama, yina lwalaka na mbele ya yinda, mpe kufwaka ve.

¹⁸¹ Ntangu yayi, beto zaba, kukondwa ata ntembe mosi ve, nani vwandaka niama yina, yina lwalaka kasi kufwaka ve. Ya vwandaka ntangu Rome ya mumpani kufwaka, mpe Rome ya pape bakaka kisika; ntangu ngolo ya mumpani kufwaka, mpe ngolo ya pape bakaka kisika.

¹⁸² Ntangu yayi, ntangu yayi, Apocalypse 13:14. Yesu, na Matthieu 24, kebisaka bawu samu na yawu. “Kifwanusu ya niama.”

¹⁸³ Paul, ba-Théssalonissien ya Zole kapu 2, nzila ya 3 mpe nzila ya 4. Beto baka yawu, beto tala Paul, yina yandi ke tuba awa samu na yawu. Mpeve-Santu ya nene yina vwandaka na zulu ya profete yayi ya nene ya Mfumu, beno tala yina yandi me tuba samu na yawu na kilumbu ya nsuka. Na ba-Théssalonicien ya Zole, kapu 2 kisika ya kele. Mbote mingi, tata. Mpe kubanda na nzila ya 3, mu ke kwikila ya kele. Mbote mingi, beto tanga ntangu yayi. Beno kuwa na bukebi, beno nionso. Bantu yikwa ke kwikila ti Paul vwandaka ya kufuluka na Mpeve-Santu? Amen. Beno tala awa.

Ata muntu ve fwana kuvuna beno na konso mutindu: samu ti kilumbu yango ke salama ve, ntete bantu mingi kumanga Nzambi,...

Yandi ke meka na kubasisa yawu na yintu ya bawu ti Yandi ke kwisa na ntangu yina. Yandi tubaka, “Ya fwana vwanda na bantu yina ke manga lukwikilu ti ba ke kwenda ntama na Dibuuundu, ntete,” beno me mona, yina ke salama na Nsungi ya Laodicée.

...mpe muntu yina ya masumu ke monisama pwelele,...

“Muntu ya masumu,” kukondwa lukwikilu na Mpeve-Santu. Kukondwa lukwikilu ke monisama pwelele.

...muntu yina ke zimbana kimakulu;

Mutindu Judas vwandaka; vwandaka trésorier ya dibuundu.

Yandi ke telama mpe ke manga bima nionso yina bantu ke sambilaka, mpe ke talaka ti ya kele ya Nzambi; yandi ke sala yawu tii na kwenda kuvwanda na kati ya tempelo ya Nzambi na kutubaka ti yandi kele Nzambi,...

Mpangi-bakala, ya ke na muntu mosi na zulu ya ntoto, na nganda ya Vatican, yina ke sala yawu? Wapi sika yawu kele?

¹⁸⁴ Ntangu yayi, beto landila awa na Apocalypse 13, mpe kutalisa na beno ti muntu yayi me vwanda na zulu ya mbanza. . . na kati ya mbanza, mpe mbanza me vwanda na zulu—na zulu ya miongo sambwadi. Mpe ntalu ya niama kele nkama sambanu na makumi sambanu na sambanu, ba me sonika yawu na—na Latin. . . na alphabet ya Rome, ya kele nkama sambanu na makumi sambanu na sambanu, ya kele *VICARIVS FILII DEI*, ya zola tuba, “Na kisika ya Mwana ya Nzambi,” na zulu ya kiti ya kimfumu ya pape. Mpe kiti ya yandi, kele na bayimpu tatu. Mpe mu me monaka yimpu yayi, ya vwandaka pene-pene ya munu mutindu diboko ya munu na kizizi ya munu, mutindu yayi, mpe—mpe mu monaka yimpu ya pape kuna na Vatican, munu mosi, mu vwandaka kuna mpe mu monaka yawu, samu na kundima ti mu me zaba yina mu ke na kutuba. “Yandi ke telema mpe ke manga, yina nionso ba ke bokilaka Nzambi, mpe bantu nionso ya santu. Yandi kele ya santu kulutila bantu nionso; yandi me vwanda na kati ya tempelo ya Nzambi, na kutubaka ti yandi kele Nzambi,” na kulemvokilaka masumu na zulu ya ntoto, mpe nionso yina, beno zaba. Ya kieleka.

¹⁸⁵ Paul tubaka, “Ti bantu mingi ke manga lukwikilu, ti muntu yina ke zimbana kimakulu ke monisama pwelele.”

Beno ke bambuka moyo diaka ve, ti, ntangu mu vwandaka. . . na beno, mu zabisaka beno mambu yayi?

¹⁸⁶ Oh, mu zolaka vwanda kuna, samu na kuwa Paul kulonga yawu, beno ve? Hum! Wapi mutindu mu zolaka kuwa yandi! Oh, la la!

¹⁸⁷ Ntangu yayi yinki yandi ke sala? “Kifwanusu ya niama.” Ba-Théssalonicien ya Zole. Ntangu yayi beno kuwa. Beno kuwa

na bukebi ntangu yayi, na bukebi nionso. Dibuundu zabaka ntete ti pape mosi ke kwisa. Yinki ya kele? Nsuka ya nsungi ya dibuundu yina, Paul. Bawu monaka kima yayi ya Nicolaïsme vwandaka kumata; ba zolaka sala muntu ya santu, (Yinki) pape. Mambu ya yinza mpe ba-aristocrate kotaka na dibuundu, mpe sobaka mutindu ya kusambila. Paul, na Mpeve-Santu, simbaka yawu na Mpeve. Mpe dibuundu, na bakalasi ya yawu mpe bantu ya lukumu, bantu ya nene ya lukumu, mpe nionso yina, ba monaka ti kima mosi ke zola kusalama. Mpe Mpeve-Santu vwandaka kebisa bawu samu na bilumbu ya nsuka. Beno ke bambuka moyo ve wapi mutindu Yesu tubaka yawu? Bisalu ya Nicolaïsme, yina na nsuka kumaka malongi, na manima yawu kumaka organisation! Bampangi, beto ke na mudidi ve ntangu yayi. Beno bambuka moyo, beno me mona. Beto me kuma kisika yango.

¹⁸⁸ Bisalu ya Nicolaïsme, organisation na mbandukulu ya yawu, na bantu ya yawu ya nene ya lukumu, mpe yina vwandaka kuyala mabuundu, mpe nionso yina, na manima bawu salaka dibuundu ya Catholique. Mpe Paul tubaka ti na ntangu ya nsuka ke kwisa ve, ntangu ke kwisa ve, kana bantu kumanga ve Lukwikilu ya kieleka, ya pentecote. Lukwikilu ya kieleka ya pentecote ke zimbana, mpe bantu ya lukumu ke vwanda mbote-mbote. Ba ke vwanda na muntu yina ke baka kisika ya Nzambi yina ke vwanda na kati ya tempelo ya Nzambi, mpe ya ke manga, mpe ke yala na zulu ya bantu nionso mutindu yayi. Mpe, yawu, beno me mona, yinki ya kele? *Nickao*, “kuyala bandimi.” Beno me mona? “Nionso yina ba ke bokila Nzambi; yandi ke vwanda na kati ya tempelo ya Nzambi, mutindu Nzambi.” Paul tubaka, “Bantu ke manga lukwikilu, ntete, na bilumbu ya nsuka.” Mpe beto me kuma kisika yango ntangu yayi, mpe beto ke mona kumanga ya lukwikilu yango, mpe na kumonaka dibuundu ke kwenda ntama mpe ntama na Yawu, mpe ke vutuka diaka na manima. Mpe beto me kuma na ntangu ya nsuka. Mbote mingi.

¹⁸⁹ Ntangu yayi, kana basabala makumi sambanu na yivwa me fwanana na mutindu ya kulunga, mpe ba-Juif kele na yinsi ya bawu ntangu yayi, mpe dibuundu ya Bantu ya makanda ke fwana kieleka na ntangu ya nsuka, na ntangu ya Nicolaïsme. . . . to ntangu ya Laodicée; wapi mutindu me kuma pene-pene Nkwizulu ya Mfumu, nsuka ya bima nionso, nsuka ya nsungi yayi, mpe Enlevement? Ntangu Yandi ke banda sabala yina ya makumi sambwadi, to bamvula sambwadi, Dibuundu me kwenda.

¹⁹⁰ Beno lenda mona yawu, bankundi? Beno telemisa maboko ya beno kana beno lenda mona yawu. Beno me mona? Ntangu yayi, beto vwanda bana ve. Beto sala nsaka diaka ve. Beto me kuma na ntangu ya nsuka. Kima mosi ke zola salama. Beto me kuma na nsuka. Beto me kuma kisika yango.

¹⁹¹ Basabala makumi sambanu na yivwa yayi me fwanana

na mutindu ya kulunga; kukwenda ya ba-Juif me fwanana na mutindu ya kulunga; nsungi ya dibuundu me fwanana na mutindu ya kulunga. Beto me kuma na ntangu ya nsuka, ntangu ya nsuka, nsungi ya dibuundu ya Laodicée, nsuka ya yawu. Minati nsangu ya bambwetete bawu nionso me longa nsangu ya bawu. Ya me longama. Beto ke na kudindumuka kaka. Ba-Juif me vutuka kubanda bamvula makumi yiya. Bawu kele na yinsi ya bawu.

Yinki ke salama na manima? Nkwizulu ya Ditadi. Beto me kuma kisika yango. Yinki ntangu ya ke salama? Mu me zaba ve. Kasi, mpangi, samu na munu, mu zola ti beno vwanda ya kukubama. Mu zola ti bilele ya beno nionso kuvwanda ya kuyilama.

¹⁹² Ntangu yayi, beto me bikala kaka—kaka na ntangu fioti, mu ke zola ti beno kuwa na pima nionso ntangu yayi samu na mwa ntangu fioti.

Ntangu Yandi ke banda sabala ya makumi sambwadi, to bamvula sambwadi, Dibundu me kwenda. Beno kuwa ntangu yayi. Mu ke vutukila yawu diaka, mu ke vutukila yawu, samu ti beno zimbana ve. Yawu yayi Mpeve-Santu tulaka na nsongi ya kilapi ya munu ntangu mu vwandaka sonika. Beto kele na nsungi ya Laodicée. Klisto me losama na dibuundu ya Yandi mosi. Mbwetete ya nsungi yayi, Nsangu, me longama. Mpe Israel kele na yinsi ya yandi. Beno me mona kisika beto kele? Beto me kuma na nsuka.

Ntangu yayi, mulabu mosi to zole diaka.

¹⁹³ Nionso yayi ntangu yayi beto ke mona, ke sadisa beto, na lemvo ya Yandi, mutindu beto ke sala ngolo na belama na Bidimbu Sambwadi yayi ya nsuka. Beno me mona wapi sika beto zolaka luta na lweka yawu? Kubanda Apocalypse 6:1 tii na Apocalypse 19:21, beto zolaka luta na lweka ya yawu, samu, beno me mona, beto vwandaka meka na kutula yawu *kuna*, na nsungi yayi ya Bantu ya makanda; na yina, beno me mona, nsungi *yayi* me kuma na nsuka. Beno me mona?

Ntangu yayi, beto me siamisa yawu na nzila ya Ndinga ya Nzambi, mpe na nzila ya masolo, mpe na nzila bima nionso, mpe na nzila ya bidimbu ya bantangu, na nzila ya bilumbu, ti kima mosi diaka ve me bikala. Beto me kuma nsuka ya Bantu ya makanda. Yinki—yinki beto ke sala samu na yawu? Ya kele samu na moyo ya munu mpe moyo ya beno; ya kele samu na luzingu ya munu mpe luzingu ya beno; ya kele samu na baluzingu ya bankundi ya beto ya luzolo. Ba me bondila beto mingi. Beto me kuzwa bima mingi kukondwa mpasi. Kulutila mbote beto kwenda na ntuala. Ntangu me luta mingi na yina beno ke banza, beno bambuka kaka moyo.

¹⁹⁴ Ntangu yayi, mu ke sala nsamunu mosi, kana beno zola sonika yawu. Beno kuwa na bukebi, pardo. Yayi ke mulabu ya

munu ya nsuka, na manima ya yawu; mu ke na mwa kima mosi ya fioti awa kaka na manima ya yayi, mwa noti mosi mu zola tubila. Ntangu yayi beno pema mwa ntangu fioti mpe beno kuwa na bukebi, mu ke pesa beno kima mosi ya mfunu, na dibanza ya yina beto me katuka na kutuba. Beno me mona?

Ya ke ata na vimbu ya lutebo ve kati-kati ya nsungi yayi na Nkwizulu ya Klisto. Bima nionso, kima mosi ve me bikala. Israël kele na yinsi ya yandi? Beto me zaba yawu. [Dibuundu me tuba, “Amen.”—Mu.] Beto kele na Nsungi ya Laodicée? [“Amen.”] Nsangu ya nsungi yayi ya pentecote me longama, samu na kumeka kuningisa na kuvutuka na Lusakumunu ya kieleka ya pentecote? [“Amen.”] Ya vwandaka mutindu mosi samu na minati nsangu nionso, yina kwisaka na kati ya bansungi? [“Amen.”] Bayinsi ke nwanisa bayinsi yankaka? [“Amen.”] Bimpupa? Nzala kele na kati ya yinsi bubu yayi, Dibuundu ya kieleka ke na kutambula na tomabilu bankama ya ba-miles samu na kusosa kuwa Ndinga ya Nzambi? [“Amen.”] “Samu na dimpa kaka ve, kasi na kuwaka Ndinga ya Nzambi.” Nzala kele. Ya kieleka? [“Amen.”] Na yina, beto ke na kuzinga na kati-kati ya yawu, kaka na ntangu yayi awa. Beno me mona kisika beto kele? Beto ke vingila Ditadi yina.

¹⁹⁵ Nsamunu ya mfunu! Kubanda ntangu Nzambi pesaka nsilulu tii na Abraham... Beno kondwa yayi ve. Kubanda ntangu Nzambi pesaka nsilulu na Abraham, Genèse 12:3, tii na ntangu Klisto me losama na mvula 33 na Manima ya Klisto, na ba-Juifs, landila Galates 3:16 mpe 17, mpe landila ntangu ya Usher, ya U-s-h-e-r, ntangu ya ba-Hebreux ya Usher; ngolo ya Nzambi vwandaka na ba-Juif kieleka na bamvula funda mosi na nkama yivwa na makumi tanu na yiya. Nzambi salaka na ba-Juif bamvula funda mosi na nkama yivwa na makumi tanu na yiya, landila ntangu ya ba-juif, mpe landila Galates 3:16 mpe 17. Mu kele diaka na Masonuku mingi, kasi mu ke pesa kaka yina.

Na yina, na manima bawu losaka Klisto, Yandi balukaka na Bantu ya makanda, samu na kubaka bantu samu na Nkumbu ya Yandi. Beno zola Masonuku samu na yawu, kisika? Actes 15:14.

¹⁹⁶ Ntangu yayi, na kutangaka ntangu, beto ke mona ti beto kele kieleka (beno kuwa) bamvula kumi na sambwadi me bikala, mpe beto ke kuzwa mpe kitini ya ntangu ya mutindu mosi, mutindu Nzambi ke sala na beto na kati ya ngolo ya Mpeve-Santu, kubanda mvula 33 na Manima ya Klisto tii na mvula 1977. Kitini ya ntangu ya mutindu mosi, ya bamvula funda mosi na nkama yivwa na makumi tanu na yiya, Nzambi ke sala na beto mutindu mosi Yandi salaka na ba-Juif. Yinki beno ke tuba samu na yawu!

¹⁹⁷ Ntangu yayi, beno sonika yawu na buku ya beno, mwa Masonuku yayi awa mu ke zola kupesa beno. Levitique 25, kubanda na nzila ya 8. Nzambi bokilaka mukembu, konso mvula

ya makumi yiya na yivwa. Mvula ya makumi tanu vwandaka mukembu. Beto me zaba yawu. Beto ke bakula yawu. Kubanda mukembu ya ntete, ya Levitique 25:8, na mvula 1977 ke vwanda mukembu ya makumi sambwadi, na kusalaka kieleka bamvula mafunda tatu na bankama yiya na makumi na tatu. *Yubile*, zola kutuba, “Kumata! Kukuulama!”

Oh, beto ke vingila kilumbu yina ya kiese ya
Millenium,
Ntangu Mfumu ya beto ke kwisa sosa Kento ya
Yandi ya makwela ke vingila Yandi;
Oh, yinza ke na kuboka, ya ke na kuvumuna
samu na kilumbu yina ya kukuulama,
Ntangu Mvulusi ya beto ke vutuka diaka na
zulu ya ntoto.

¹⁹⁸ Beno me bakula yawu? [Dibuundu me tuba, “Amen.”—Mu.] Nzambi me sala na beto kieleka na bantangu mutindu mosi yina Yandi salaka na ba-Juif. Kubanda ntangu Yandi pesaka Abraham nsilulu, tii na kulosama ya Mesiya na mvula 33 na Manima ya Klisto, ya vwanda na bamvula funda mosi na bankama yivwa na makumi tanu na yiya. Mpe ntangu yayi beto me bikala na bamvula kumi na sambwadi. Beto vwandaka na bamvula pene ya funda mosi na bankama yivwa na makumi tatu na ndambu. Beto me bikala na bamvula kumi na sambwadi, tii na mvula 77, ya ke vwanda mukembu ya sambwadi kubanda mbandukulu ya mikembu. Mpe yinki ya ke vwanda? Oh, mpangi-bakala! Beno tala mbote ntangu yayi. Beno kondwa yawu ve. Ya ke vwanda na mukembu ya kukwenda ya Kento ya makwela ya Bantu ya makanda, mpe kuvutuka ya Klisto na ba-Juif, ntangu bawu ke basika na kimpika. Amen! Beno ke mona ve? Ba me katuka na yinza ya muvimba, ba me vukana kuna kilumbu yina. Oh, la la! Beno me mona kisika beto kele? Beto me zaba ve yinki ntangu ya fwana salama. Beto kele na ntangu ya nsuka.

¹⁹⁹ Beno kuwa ntangu yayi. Samu na beno bantu ya ntama awa na—na yinzo-Nzambi, bayina ke kwisaka awa kubanda ntama, mu ke zola ti beno zaba kima mosi. Mu me zabaka yawu kaka mazono; mu me baka yawu na muntu mosi ya masolo, Paul Boyd, na manima. . . Mpe mu me sosa-sosa yawu kuna na Masonuku, mu me mona ba-date yayi yankaka awa, mpe nionso yina, mpe na yawu, mpe mu me sosa-sosa, na nsongi mosi mpe yankaka.

²⁰⁰ Ntangu yayi, na 1933, ntangu beto vwandaka sala balukutakanu ya beto awa na tempelo ya ba-Franc-maçon, kisika dibuundu ya Klisto kele bubu yayi. Na suka mosi na Ngonda ya yiya, na ntwala kukatuka na yinzo. . . Mu vwandaka bieka tomabilu ya munu. Mu kuzwaka tomabilu ya modele 33, mpe mu vwandaka bieka yawu samu na kisalu ya Mfumu. Mpe na vision yango, mu monaka ntangu ya nsuka. Ntangu yayi beno tala wapi mutindu ya kele mfunu, na ntangu yina mu vwandaka kaka mwana ya fioti. Mpe beno lenda banza

yina lendaka vwanda, tomabilu ya modele ya 1933, kuna. Mpe mu kwendaka kuna na tempelo ya ba-Franc-maçon, kisika. . . Bayankaka na kati ya beno bantu ya ntama awa ke bambuka moyo. Mu me sonika yawu na papié mosi ya ntama, na yinzo ya munu. Ya me basikaka dezia mpe me mwanganaka na yinza ya muvimba. Beno me mona? Ya vwandaka na mvula 1933. Mpe mu zabisaka na ntwala ti ya ke vwanda na diambu ya nene ya kiadi ke salama na Etats-Unis na ntwala to pene ya mvula 1977. Bantu yikwa ke bambuka moyo ti mu tubaka yawu? Beno tala maboko. Ya kieleka.

²⁰¹ Beno tala ntangu yayi, mu zabisaka na ntwala bima sambwadi yina ke salama diaka samu na kusala. . . na ntwala kubeba yayi ya nene to diambu ya nene kusalama awa na Etats-Unis, mwa mambu ya nene ya kiadi.

Mu tubaka, beno bambuka moyo ntangu yayi, yayi vwandaka na ntwala yawu salama, mu tubaka ti beto ke kota na Mvita ya Zole ya Yinza ya muvimba. Bantu yikwa kuwaka munu kutuba yawu? Beno tuba, "Amen." [Dibuundu me tuba, "Amen."—Mu.] Mbote mingi. Mvita ya Zole ya Yinza ya muvimba! Mu tubaka, "Ntwadisi ya yinsi ya ntangu yayi. . ." Mu sonikaka yawu na Masonuku ya munu ya ntama, kuna, na papié ya munu ya ntama mazono, ti, "Ntwadisi ya yinsi yina beto me kuzwa ntangu yayi," yina vwandaka. . . Bantu yikwa ke bambuka moyo nani ya vwandaka? [Mpangi-bakala mosi me tuba, "Franklin Roosevelt."] Franklin D. Roosevelt. Mu tubaka, "Ntwadisi ya yinsi ya ntangu yayi ba ke pona yandi mbala yiya," yandi vwandaka na mbala ya yandi ya ntete, "ba ke pona yandi mbala yiya, mpe beto ke kota na Mvita ya Zole ya Yinza ya muvimba."

²⁰² Mu tubaka, "Ntwadisi ya nkú yina ke na kutelama na Italie, ya zola tuba Mussolini, yandi ke baka kimfumu. Mpe yandi ke kwenda na Ethiopie, mpe Ethiopie ke kubwa na makulu ya yandi." Ya ke na bantu yina kele awa ntangu yayi yina me zaba, ti ya ke na kimvuka ya bantu yina kwisaka kuna, ntangu mu salaka lukutakanu ya munu na Hall Redman kuna na nkokila yina, ntangu mu zolaka kwenda longi yawu kuna, na Hall Redman, mpe ba zolaka losa munu na nganda ya kivinga yina samu mu me tuba diambu ya mutindu yina. [Mpangi-kento Wilson me tuba, "Amen. Ya kieleka."—Mu.] Yinga. Yinga. Mama Wilson, Mu zaba ti nge ke. . . Ya kieleka. Ntangu mu tubaka ti. . . Kasi yandi salaka yawu? "Kasi," mu tubaka, "nsuka ya yandi ke vwanda ya nsoni," mpe ya vwandaka mutindu yina. Yandi na kento yina ya vwandaka zinga na yandi, ba diembikaka bawu na nsinga yintu na ntoto na bala-bala, na makulu na zulu, na bilele ya bawu yina vwandaka diembela. Mbote mingi, yawu me salama.

²⁰³ Na manima mu tubaka, "Bakento me kuzwa muswa ya kupona. Yina kele kieleka nsoni samu na yinsi. Mpe, na kupona yango, kilumbu mosi ba ke pona muntu ya yimbi." Mpe ba me

sala yawu na kupona yayi ya nsuka. Oh, la la, la la! Yiya. . . (Mu tubaka, “Bantu ya mayele ke kwenda na ntwala mutindu yayi. . .”) Ve, awa, ya ke ya tatu. Beno lemvokila munu.

²⁰⁴ Yayi kele yina me landa, kuna, ya yiya. Mu tubaka, “Mvita ya beto ke vwanda na Allemagne, mpe ba ke tunga kisika ya nene ya bêtô samu na kukikengila bawu mosi kuna, mpe ba-Americanin ke kubwa kimakulu.” Nzambi ya Ngolo nionso me zaba, na ntwala ya Yina mu me telama na ntangu yayi, mu monaka ba-Nazi ya kimpwanza yina vwandaka bula ba-Américain na makulu mutindu yayi, mpe nionso yina, na kibaka yina. Mpe ya ke na bantwenia mingi ya babakala me talama awa ntangu yayi yina vwandaka na Ndilu yina ya Siegfried, yina me zaba wapi mutindu vwandaka. Mpe beno bambuka moyo, yina vwandaka bamvula kumi na mosi na ntwala ba tunga Ndilu ya Siegfried. Nzambi kele ya kieleka? Yandi ke zabisa kaka mambu na ntwala? Beno tala mbote. Ya kele, yina vwandaka ya yiya.

²⁰⁵ Ntangu yayi ya diambu ya tanu. “Bantu ya mayele ke kwenda na ntwala mingi ti ba ke sala tomabilu yina ba ke twadisa ve na volant. Mpe batomabilu ke landila na kukuma mutindu diki, tii na kubeba, ntangu ya nsuka. Mu monaka dibuta ya ba-Américain ke tambula na tomabilu na bala-bala, na bala-bala ya nene, mukongo ya kubalula na kisika yina volant lendaka vwanda, ya monanaka ti ba vwandaka bula nsaka ya dame to ya bakalati.” Mpe beto ke na yawu. Ya kele na television. *Popular Science, Mechanics*, mu zola tuba, ba ke talisaka yawu nionso. Beto ke na tomabilu. Ya me tumama na télécommande, na—na radar. Ba ke na mfunu ya volant ve na kati ya yawu. Beno fwana kaka kutula numelo mutindu yayi, mutindu beno ke tulaka numelo na allo-allo, mpe tomabilu ya beno ke nata beno mbala mosi kuna; ya ke vwanda na kisumbula ve, to kima mosi ve, ya ke vwanda na batomabilu yankaka. Aimant ke nata yankaka nionso ntama na beno. Beno me mona? Ba ke na yawu. Oh, la la! Beno banza na yawu. Ya zabisamaka na ntwala bamvula makumi tatu na ntwala ya salama!

²⁰⁶ Ntangu yayi, yina me nata beto na kupona Ntwadisi ya yinsi Kennedy.

Mpe tomabilu yayi me—me kwisa, ya me sala bima tanu (na kati ya sambwadi) yina me salama na mutindu ya kieleka.

²⁰⁷ Ntangu yayi, mu zabisaka na ntwala, mpe mu tubaka, “Mu me mona kento mosi ya lukumu kutelama, ya kitoko, yina me lwata bilele ya kimfumu mutindu violet.” Mpe mu ke na mwa lupangu awa, “(Yandi vwandaka ntwadisi ya nene na Etats-Unis; ntangu yankaka dibuundu ya Catholique.)” Kento, kento mosi; mu me zaba ve kana ya ke vwanda dibuundu ya Catholique. Mu me zaba ve. Mu lenda tuba yawu ve. Kima mosi kaka mu monaka, mu monaka kento, ya vwandaka kaka yina.

208 Kasi yayi kele yinsi ya kento. Yinsi yayi kele na ntalu kumi na tatu, na profesu. Ya kele na ba-bande kumi na tatu, bambwetete kumi na tatu. Yawu bandaka na colonie kumi na tatu. Kumi na tatu, kumi na tatu, bima nionso kele kumi na tatu. Ya ke monana na kapu 13 ya Apocalypse, mpe. Yandi kele kumi na tatu. Mpe yandi kele yinsi ya kento.

209 Ba-tribunal ya kufwa makwela na Amérique ke sambisa mambu mingi ya kufwa makwela, na nzila ya bakento, kulutila bayinsi nionso yankaka. Bumuntu na yinsi ya beto kele kulutila yimbi, mpe bakufwa makwela, kulutila na France to na Italie, kisika kindumba kele na bala-bala. Na yawu, kasi bawu kele bakento ya kindumba; na sika ya beto ya kele bakento ya makwela yina ke meka na kuzinga na babakala mingi, mpe babakala mingi ya makwela ke meka na kuzinga na bakento yankaka.

210 Na bayinsi kisika ba ke na polygamie, ya ke bambala mafunda kulutila mbote. Mpe, diaka, polygamie kele yimbi, beto zaba. Kasi, ya ke kaka samu na kutalisa beno mutindu beto me kubwa na nsi mingi.

211 Mu ke na kitini ya zulunale kuna, kisika ya me talisa ti ntangu bana ya beto ya babakala ya ba-American kwendaka na bayinsi ya nzenza, na mvita ya nsuka, ya vwandaka kulutila, mu ke kwikila, ya vwandaka pene ya makumi sambwadi na zulu ya nkama mosi. . . Na yina, ntangu yayi, beno vingila fioti, mu ke kwikila ti ya vwandaka tatu na zulu ya yiya yina kwendaka na bayinsi ya nzenza, yina kufwaka makwela na bakento ya bawu na ntuala bawu vutuka. Mpe na bisono ya nene yintu ya zulunale me tuba, “Yinki diambu me kumina bumuntu ya bantu ya beto ya Amérique?” Beno ke bambuka moyo ti beno monaka yawu? Beno nionso monaka yawu, mu banza. “Yinki diambu me kumina bumuntu ya bakento ya beto ya Amérique?” Na bakompani, ba ke sala kuna na babakala yankaka. Ya kele yinsi ya kento. Yinki yandi ke kuzwa? Nzambi-kento, to nzambi ya kento.

212 Ntangu yayi, na yina, na manima ya yina, mu balukaka mpe mu talaka. Mpe mu monaka Etats-Unis yayi ke pela mutindu makala, matadi kupanzanaka. Mpe ya vwandaka pela mutindu nkuta ya tiya na bankuni, to kima mosi ba me tula na tiya. Mpe mu talaka ntama kuna mutindu mu lendaka mona, mpe yawu kubebaka kimakulu. Na manima vision bikaka munu. Tanu na kati ya tatu me salama. . . to tanu na kati ya sambwadi, mu zola tuba, me salama.

213 Mpe tala ya me talisama. Na manima mu zabisaka na ntuala. Mu me tuba ata fioti ve ti Mfumu me tuba na munu yawu, kasi, na suka yina na yinzo-Nzambi, mu tubaka, “Mutindu mambu ke kwenda. . .” Mu kwendaka na nsuka ya kibaka mosi, mpe mu vutukaka tii na nsuka yankaka ya kibaka. Mu tubaka, “Mutindu mambu ke kwenda, mu ke zabisa na ntuala ti ntangu. . . Mu zaba

ve samu na yinki mu ke tuba yawu. Kasi mu ke zabisa na ntuala ti nionso yina ke salama kubanda ntangu yayi, mvula 1933, mpe 1977.”

Mpe kukondwa kuzaba yawu, Nzambi me zaba ntima ya munu, mu zabaka yawu kaka mazono, ti mvula 1977 kele mukembu, mpe kieleka bantangu mutindu mosi na yina Yandi pesaka Israël, mpe nionso yina na nsuka. Na yawu beto kele. . . Mpe awa beto me kuma na nsuka ya nsungi, na nkwizulu ya sabala ya makumi sambwadi. Beto me zaba ve ntangu yina Dibuundu ke kwenda. Oh, la la! Yinki beto lenda sala, bankundi? Wapi kisika beto kele?

²¹⁴ Beno me mona yina beto kele ntangu yayi? [Dibuundu me tuba, “Amen.”—Mu.] Beno me bakula sabala ya makumi sambwadi ya Daniel ntangu yayi? [“Amen.”]

Beno me mona, ntangu yayi, ntangu beto ke mona Bidimbu yayi mpe nionso yina, beto ke zibula Bidimbu yayi. Yina ya ntete ke kwisa, kele munati mpunda na mpunda ya mpembe, yandi ke na bunduki na diboko ya yandi. Beno tala yina muntu yayi kele. Beno tala mpunda yayi ya ntinta kati-kati ya ndombe na mpembe ke kwisa na manima ya yandi. Beno me mona? Beno tala nani ya kele, mpe beno tala wapi mutindu ba ke kwisa. Beno tala nkama na makumi yiya na yiya ya mafunda yina ke kwisa. Beno tala mwense yina ya kulala ntangu yandi ke kwisa. Na manima beno tala bima yayi nionso ke na kusalama, kumwangana ya Bambangi, Bakiadi, bampeve tatu ya mvindu mutindu bakiula. Beno tala bima yina mutindu ya ke wisana na bampasi yina, kieleka ntangu ba me tiamuna yawu. Konso ntangu Kidimbu mosi me zibuka, mpasi mosi ke tiamuka, mpe kubeba ke kwisa. Mpe beno tala yina ke salama ntangu yayi na nsuka.

²¹⁵ Mpe, oh, beno tala baprofete yayi tatu. . . to baprofete yayi zole, ntangu ba ke monana kuna. Mpe na kati-kati ya sabala, ba me katula bawu mutindu yayi, na manima Mvita ya Harماغuédon ke banda. Na manima Nzambi ke banda na kutuba, Yandi mosi, na manima Yandi ke telama mpe ke banda na kunwana. Baprofete yayi ke bula ntoto. Ba ke longa na Nkumbu ya Yesu Klisto. Ba ke botika mutindu mosi. Ba ke sala kima ya mutindu mosi yina ba-pentecotiste ya ntete, batata salaka, mpe mingi ke na kulanda bawu. Kasi yina salaka kimvuka ya mabuundu, organisation yina, landilaka kaka na kukwenda, ata mpe ngolo ya baprofete yayi kubukaka yandi ve. Mpe na nsuka bawu tubaka, “Beto ke vukisa nionso organisation mosi.” Mpe yandi kotisa (Yinki yina?) busafu, Romanisme, yina ke mwangana bisika nionso, yina ke pesa kiadi. “Busafu yina ke pesa kiadi,” ke vwanda bisika nionso, “mvindu.”

²¹⁶ Beno bambuka moyo, mama ya ntama ya kindumba yina me vwanda na zulu ya niama, yina me lwata bilele ya mbwaki mutindu yayi, ya vwandaka na bayintu sambwadi na bibongo

kumi. Beno ke bambuka moyo na yawu? “Mpe yandi vwandaka na mbungu, ya kifuluka na busafu ya yandi.” Yina vwandaka malongi ya yandi yina yandi vwandaka mwangisa na bantu. Mpe beto me kuma kisika yango, bampangi ya munu. Beto me kuma na ntangu ya nsuka.

²¹⁷ Bana ya fioti, beno me zaba ata fioti ve, ntangu yankaka beto lendaka zinga mingi ve samu na kuvutuka diaka na nkokila yayi. Ntangu yankaka beto lendaka zinga ve samu na kumonana mosi na yankaka. Mu zaba ve. Kasi, nsuka me kuma pene-pene, nsuka me kuma pene-pene. Masonuku yawu yayi. Ya ke na kidimbu ya kieleka, ya kulunga, na nzila ya Masonuku.

²¹⁸ Ntangu yayi, kana ya ke na kima mosi beno me bakula ve, beno sonikila munu mukanda mpe beno zabisa munu yawu. Beno me mona? Beno tuba kima mosi. Bayankaka na kati ya beno bampangi yina ke kuwa ba-bande, na bisika yankaka, kana ya ke na kima mosi mu lenda sadisa beno, beno zabisa munu. Beno lenda wisana na munu ve, mpe mu lenda wisana na organisation ya beno ve; beno ve, kasi systeme ya organisation ya beno. Mu ke teleminaka bantu ya Catholique ve. Mu ke tuba ve ti mu ke zolaka ve bantu ya Catholique, mu ke zolaka ve bantu ya organisation. Ya ke mutindu yina ve. Mu ke zolaka bantu nionso, kasi mu ke wisana ve na systeme yina ke kanga beno kuna. Yawu kele, systeme yina. Yawu yina.

²¹⁹ Mu ke teleminaka ve Allemagne; ya vwandaka Nazisme. Mu ke teleminaka ve ba-Italien; ya vwandaka samu na Fascisme. Mpe beno bambuka moyo, mu zabisaka diambu yankaka na ntwala na ntangu yina, mu zabisaka yawu kaka na ntwala, mpe mingi na kati ya beno bantu ya ntama ke bambuka moyo na yawu. Mu tubaka, “Ya ke na ba-isme tatu ya nene yina ke meka na kusimba yinza bubu yayi: Fascisme, Nazisme, na Communisme.” Mpe yinki mu tubaka? “Bawu nionso ke kota na Communisme.”

²²⁰ Na yina mu lombaka na beno na kuvutukila yawu, “Beno tala mbote Russie.” Beno ke bambuka moyo na yawu? “Beno tala mbote Russie. Yawu nionso ke kota na Communisme.”

Na manima yawu nionso ke kota, na nsuka, na Catholicisme. Beno bambuka moyo, yawu nionso ke kota na Catholicisme na ntangu ya nsuka. Yina kele nionso ya kieleka. Ya kele na Mvita ya Harmaguédon, ntama *awa*, ntangu Klisto ke kwisa, Yandi mosi.

²²¹ Kasi baprofete tatu yayi. . . Bamvula tatu na ndambu yayi, mu zola tuba, ya ke na Apocalypse 11:3, beno me tanga yawu mbala mingi, “Mu ke pesa ngolo na bambangi ya Munu zole, mpe ba ke pesa profesi bilumbu funda mosi na bankama zole na makumi sambanu.” Ya ke sala yikwa, bilumbu funda mosi na bankama zole na makumi sambanu? Bamvula tatu na ndambu. “Na manima ba ke kufwa bawu na bala-bala,” na kati-kati ya sabala ya makumi na sambwadi.

Na yawu, beno me mona kisika basabala makumi sambwadi ya Daniel kele? Beno me mona kisika beto ke na kuzinga? Beto me kuma na nsuka, bankundi ya munu ya luzolo. Beto me kuma na nsuka. Bilumbu. . .

Bayinsi ke na kupanzana, Israel ke na kuvumbuka,
Bidimbu yina baprofete zabisaka na ntuala;
(Beno me kuma kisika yango.)
Ba me tanga bilumbu ya Bantu ya makanda,
(Awa.) ba me fuluka na boma;
“Beno vutuka, O beno bayina mwanganaka,
beno mosi.”

Beto yimba yawu:

Kilumbu ya mpulusu me belama,
Bantima ya bantu ke na boma;
Beno vwanda ya kifuluka na Mpeve, minda ya
beno ya kukubika mpe ke sema,
Beno tala na zulu! Mpulusu ya beno me
belama!

Oh, la la! Ya ke kitoko ve?

Bayinsi ke na kupanzana, Israel ke na kuvumbuka,
Bidimbu yina baprofete zabisaka na ntuala;
Ba me tanga bilumbu ya Bantu ya makanda, ba
me fuluka na boma,
“Beno vutuka, O beno yina mwanganaka, beno
mosi.”

Kintwadi ntangu yayi:

Kilumbu ya mpulusu me belama,
Bantima ya bantu me fuluka na boma;
Beno vwanda ya kifuluka na Mpeve, minda ya
beno ya kukubika mpe ke sema,
Beno tala na zulu! Mpulusu ya beno me
belama.

Beno bika mu yimbila beno mwa nzila mosi.

Baprofete ya luvunu ke na kuvuna, ba ke
manga Kieleka ya Nzambi,
Ti Yesu Klisto kele Nzambi ya beto;

Ba ke sala Yandi Muntu ya tatu. Beno me zaba yawu. Kasi,
Yandi ke mutindu yina ve. Yandi kele Nzambi ya beto.

Kasi beto ke landa bitambi ya bantumwa.

Na yina kilumbu ya mpulusu me belama,
Bantima ya bantu me fuluka na boma;
Beno vwanda ya kifuluka na Mpeve, minda ya
beno ya kukubika mpe ke sema,

Beno tala na zulu! Mpulusu ya beno me belama.

²²² Beno ke na kiese ve? Beto vutuka na Nsangu, mpangi-bakala! Beto vutuka na kieleka! Beto vutuka na pentecote! Beto vutuka na lusakumunu ya kieleka! Beto vutuka na Nkumbu ya Yesu Klisto! Beto vutuka na mbotika ya Mpeve-Santu! Beto vutuka na bidimbu mpe mambu ya ngitukulu! Beto vutuka na pentecote! Beto kwenda ntama ya organisation! Beto vutuka na Mpeve-Santu! Yandi kele Mulongi ya beto.

Samu ti kilumbu ya mpulusu me belama,
Bantima ya bantu me fuluka na boma;
Beno vwanda ya kifuluka na Mpeve, minda ya
beno ya kukubika mpe ke sema,
Beno tala na zulu! mpulusu ya beno me
belama.

²²³ Ya ke mbote? Yinki profete me tuba? “Ya ke vwanda na ntangu yina ya ke vwanda, beno lenda tuba ve mpimpa to mwini.” Beno tala mutindu ya wandaka. Beno me mona? Oh, ya ke yimbi mingi, na kati ya bansungi ya dibuundu!

Kasi ya—ya ke vwanda na Nsemo na ntangu ya
nkokila,
Nzila ya Nkembo nge ke kuzwa yawu kuna;
Na nzila ya masa kele Nsemo ya bubu yayi,
Ya kuzikama na Nkumbu ya ntalu ya Yesu.
Ntwenia mpe kiboba, beno fungula masumu ya
beno nionso,
Ya kieleka Mpeve-Santu ke kota na kati ya
beno;
Bansemo ya nkokila me kwisa,
Ya ke kieleka ti Nzambi na Klisto kele Mosi.
Ya ke vwanda Nsemo . . .

Beto nionso kintwadi.

. . . na ntangu ya nkokila,
Nzila ya Nkembo nge ke kuzwa yawu kuna;
Na nzila ya masa kele Nsemo ya bubu yayi,
Ya kuzikama na Nkumbu ya Yesu.
Ntwenia mpe kiboba, beno fungula masumu ya
beno nionso,
Ya kieleka Mpeve-Santu ke kota na kati ya
beno.
Samu Bansemo ya ntangu ya nkokila me kwisa,
Ya ke kieleka ti Nzambi na Klisto kele Mosi.
(Tatu ve; kasi Mosi!)

²²⁴ Beto vutuka na Nsangu! Beto vutuka na mbandukulu! Beto vutuka na yina Paul me longa! Beto vutuka na mbotika yina yandi wandaka botika! Yandi monaka bantu yina bakaka mbotika mutindu yankaka; yandi tubaka na bawu na kubaka

diaka mbotika. Yandi tubaka, “Kana Wanzio me katuka na Zulu, ti Yandi longa kima yankaka, Yandi vwanda ya kusingama.” Na yawu, beto vutuka na Nsangu, nkundi ya munu! Ya ke ntangu ya nkokila.

²²⁵ Oh, mu zola Yandi mingi, beno ve? Bantu yikwa me mona sabala ya makumi sambwadi ya Daniel ntangu yayi, mpe beno me mona yina kele sabala ya makumi sambwadi? Bantu yikwa ke kwikila yawu? Beno tuba, “Amen.” [Dibuundu me tuba, “Amen.”—Mu.] Amen! Lukumu na NZambi!

²²⁶ Ntangu yayi, yinki kele kima ya kulanda? Bidimbu Sambwadi ntangu yayi. Beto ke tubila yawu, ntangu Mfumu ke pesa muswa. Yinki ntangu ya ke vwanda, mu zaba ve. Na konso ntangu yina Yandi me zola, na yina beto ke kota na yawu. Na manima beto ke vwanda na lukutakanu ya yinda, ya yinda mingi, samu ya ke baka kubanda kapu 6 tii na kapu 19, samu na kumona nionso yayi, mpe na kutala mutindu mu ke kwenda malembe na yawu.

²²⁷ Ntangu yayi, mu zola ve ti muntu mosi kukwenda kukondwa kubakula yayi mbote. Bande ke na kubaluka diaka. Mu zola ve ti muntu mosi kukondwa kubakula mbote. Beno bakula yimbi ve ntangu yayi, na kutubaka, “Mpangi Branham me tuba ti Yesu ke kwisa na mvula 1977.” Mu me tuba ata fioti ve kima ya mutindu yina. Yesu lenda kwisa bubu yayi. Kasi mu me zabisa na ntwala ti kubanda mvula 33 na mvula 77 kima mosi lendaka salama, ti bima yayi mu me mona ke salama, na vision, lendaka salama. Mpe tanu ya yawu me salama ntete. Mpe mu ke kwikila, na bima ya atome yina beto ke na yawu ntangu yayi. . .

²²⁸ Mpe beno me mona yina Ntwadisi ya yinsi ya beto me tuba? Yandi ke zola mvita yankaka. Yandi ke zola baka mbandu ya—ya Berlin, yandi me tuba. Yandi ke zola kubaka mbandu. Yinki diambu samu na Cuba awa na manima ya kielo ya beto? Samu na yinki kubaka mbandu na yawu ve? Yinki diambu samu na yawu? Oh, ya ke buzoba! Beno me mona?

²²⁹ Oh, mpangi-bakala, beto me kuma na nsuka. Ba ke. . . Ya ke salama kaka mutindu Nzambi tubaka yawu, na yawu yinki kele—yinki kele mfunu ya kusala kima yankaka na kisika ya kutanga yina Yandi tubaka, mpe kuvwanda ya kusungama, mpe kukubama samu na yawu. Mpe bika diambu yango kukwisa, na ntangu yina. Beto ke vingila yawu.

Beto ke vingila nkwizulu ya kilumbu yina ya
kiese ya Millenium,
Ntangu Mfumu ya beto ke kwisa sosa Kento
ya Yandi ya makwela yina ke na kuingila
Yandi;
Oh, ntoto ke na kuboka, ke na kudila samu na
kilumbu yina ya mpulusu,

Ntangu Mvulusi ya beto ke vutuka diaka na zulu ya ntoto.

Oh! Mfumu ya beto ke vutuka diaka na zulu ya ntoto,

Yinga, Mfumu ya beto ke vutuka diaka na zulu ya ntoto,

Oh, ba ke kanga Satana na bamvula funda mosi,

Beto ke mekama diaka ve na ntangu yina,

Ntangu Yesu ke kwisa vutuka diaka na zulu ya ntoto.

Bantu yikwa me kubama? Beno telemisa maboko ya beno.
Oh, la la!

Oh! Mfumu ya beto ke kwisa vutuka diaka na zulu ya ntoto,

Beto telama mpe beto pesana mbote mosi na yankaka.

Mfumu ya beto ke kwisa vutuka diaka na zulu ya ntoto,

Oh, ba ke kanga Satana bamvula funda mosi,

Beto ke mekama diaka ve na ntangu yina,

Ntangu Yesu ke kwisa vutuka diaka na zulu ya ntoto.

Oh! Mfumu ya beto ke kwisa vutuka diaka na zulu ya ntoto,

Yinga, Mfumu ya beto ke kwisa vutuka diaka na zulu ya ntoto,

Oh, ba ke kanga Satana bambula funda mosi,

Beto ke mekama diaka ve na ntangu yina,

Ntangu Yesu ke kwisa vutuka diaka na zulu ya ntoto.

Kuvutuka ya Yesu ke vwanda mvutu na kiadi mpe kudila ya ntoto,

Samu luzabu ya Mfumu ke fuluka na ntoto, na mubu mpe na zulu;

Nzambi ke katula bimbevo mpe ke yumisa masa ya meso ya bampasi,

Ntangu Yesu ke kwisa vutuka diaka na zulu ya ntoto.

Oh! Mfumu ya beto ke kwisa vutuka diaka na zulu ya ntoto,

Yinga, Mfumu ya beto ke kwisa vutuka diaka na zulu ya ntoto,

Oh, ba ke kanga Satana bamvula funda mosi,

Beto ke mekama diaka ve na ntangu yina,

Ntangu Yesu ke kwisa vutuka diaka na zulu ya ntoto.


²³⁰ Oh, la la! Ya ke sala beno mbote ve? Beno banza yawu, bankundi, yayi kele pentecote, ya ke kusambila! Yayi kele pentecote. Beto bula maboko mpe beto yimba yawu. Bapentecotiste, bantu nionso, beno kuma pepele ntangu yayi, beno katula nkadulu ya ntama ya mutindu ya nganda ya Methodiste ntangu yayi. Beno kwisa, beto yimba yawu!

Oh! Mfumu ya beto ke kwisa vutuka diaka na zulu ya ntoto,
Yinga, Mfumu ya beto ke kwisa vutuka diaka na zulu ya ntoto,
Ba ke kanga Satana bamvula funda mosi,
Beto ke mekama diaka ve na ntangu yina,
Ntangu Yesu ke kwisa vutuka diaka na zulu ya ntoto.

Oh! Mfumu ya beto ke kwisa vutuka diaka na zulu ya ntoto, (Biblia me tuba mutindu yina!)
Yinga, Mfumu ya beto ke kwisa vutuka diaka na zulu ya ntoto,
Ba ke kanga Satana bamvula funda mosi,
Beto ke mekama diaka ve na ntangu yina,
Ntangu Yesu ke kwisa vutuka diaka na zulu ya ntoto.

Beno zola Yandi? Mbote mingi. Mu zola Yandi. *Mu Zola Yandi*, Mpangi-kento Gibbs. Oh, beto telemisa maboko ya beto na Yandi ntangu yayi.

Mu zola Yandi, mu zola Yandi
Samu Yandi zolaka munu ntete
Mpe futaka mpulusu ya munu (Wapi kisika?
Awa kaka na Calvaire.)
Na yinti ya Calvaire.

Mu zola Yandi, (Nkembo!) mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire. 

61-0806 Sabala Ya Makumi Sambwadi Ya Daniel
Branham Tabernacle
Jeffersonville, Indiana U.S.A.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org